



說郛目錄

身第十一

輜軒絕代語

楊雄

獨斷

蔡邕

臆乘

楊伯喈

芥隱筆記

龔檢討

宜齋野乘

吳枋



輶軒絕代語

漢楊雄

鬱悠惟慮願念思也

鬱晉宋魯衛間謂之鬱悠猶鬱陶也惟凡思也慮謀思也願欲思也念常思也

眉梨羞鮐老也

東齊曰眉言秀眉也燕岱北鄙曰梨言面色如東梨也宋術曰羞言八十為羞秦晉曰鮐言背皮如鮐魚也



輶軒紀作詩  
養飾食也

陳楚間相謁而食麥饘謂之養注云饘糜也楚曰飾  
上音非下音昨

朦龐豐大也

秦晉之間凡大貌謂之朦或謂之龐燕趙北鄙凡大  
人謂之豐故燕記曰豐人杼首長也燕趙度物圍者  
豐圍朦音忙紅龐鴟鳩也

娃娥窈窕艷美也

吳有館娃宮秦有榛娥宮秦晉間美貌爲娥言娥娥

也美狀爲窈言閑都也美色爲艷言光艷也美心爲

窈言幽靜也榛音秦

奕儻容也

注云奕奕儻儻輕麗貌也自關以西凡美容謂之奕  
或謂之儻又好自謂之順言流澤也儻音葉同

私纖藐

銳音穉杪策小也

自關至梁益間凡物小者謂之私繒帛之細者謂之  
纖凡草生而初達謂之藐言鋒萌始出也穉年少也  
木細枝謂之杪燕之北鄙謂之策齊又謂之夔註云

如馬駿也傳曰慈母之怒子也折蓂筍之其惠存焉耳

臺敵

東齊海之間謂之臺自關以西凡物力同者謂之臺敵

餽餽媵音寄也

寓食為餽口傳言餽口四方是也凡寄為託寄物為媵

釐孿健子

東楚間凡人獸雙產者謂之釐孿秦晉間謂之健子自關以東謂之孿生女謂之嫁子言往適人也東齊婿為倩言可惜倩也宮婢女廝謂之娠女廝言婦人之供給使者也健音輦孿音所患娠音振同

亭公弩父

楚東海間亭父謂之亭公卒謂之弩父言主擔弩因以為名也

賊獲奴婢賤稱也

淮海間罵奴曰賊婢曰獲燕齊間民凡男而脊婢謂

之賊女而婦奴謂之獲又亡奴謂之賊亡婢謂之獲  
醜稱爾

襖裂須捷敗也

南楚凡人貧衣被醜弊謂之須捷或謂襖裂注云衣  
壞貌也左氏曰葦路襤褸以啓山林葦路柴車也襖  
音縷

袷襦筓襖倒頓袷衾

秦晉間謂無緣之衣曰袷襦江湘之間謂復襦曰筓  
襖大袴謂之倒頓小袴謂之袷衾充音皎了

屏履屨

徐兖間謂之屏音翡自關而西謂之屨中有木者謂  
之履烏絲作者曰不借

酢餽

甌自關西東謂之輩或謂之齏或謂之酢餽甌音輦  
齏音岑餽音陷

緇縶

關東謂緇關西謂之緇縶皆汲繩也緇音橘

渠拏

輶車紀代詩  
把宋魏間謂之渠拏或曰渠疏又有齒爲祀無齒爲  
衮拏音諾諸

特介

物無偶曰特獸無偶曰介傳曰澤有介麋

鋪須索也

東齊曰鋪須秦晉抖藪鋪音專

魏盈怒也

燕之郊朝鮮之間凡言呵叱者謂之魏盈

李父

陳魏間謂虎爲李父江淮謂之李耳言虎食物值耳

卽止觸其諱也又謂之於彪音烏塗關西或謂虎伯

都

鷓鴣

鳥似鷄色五色冬亦無毛常赤僕晝夜鳴音侃旦宋

魏間謂之定甲或曰獨春言好自低昂也

飛鼠

蝙蝠自關以東謂之鵬翼或曰飛鼠或曰仙鼠北燕  
謂之蠟螻音職墨

守宮諸名

秦晉謂之守宮或曰蠪蟻又曰刺易又曰蠃蟻其在澤中者易蜥楚曰蛇醫又曰蝶螈又曰蜺蟻桂木又大者蛤蚧盧纏斯侯榮原六音

舟楫諸名

江湖間大舡曰舸小舸曰艦音小艦曰舩小舩縮曰艇長而薄者曰艦音短而深者曰舩音小而深者曰艦音方舟謂之艦艇舟謂之浮梁音楫曰橈或曰權所以穩棹曰槩槩搖櫂小楫也所以縣權曰緝繫

緝索也所以刺舟曰篙維謂之舄係舡也首謂之閭今江東呼舡為飛閭或曰鷁首今舟前所作青雀是也後曰舳今呼為舵舳制未也偽謂之伉伉不安也伉音吾勃偽音訛舡搖動傾側之貌也

螻蛄曰社狗

南楚間名

笛師

蠶燕趙間名曰蠨螸

音蒙翁

其小者蠨螸大而密者曰

壺蠶注穿竹木作孔有密者謂之笛師



鼻祖

鼻始也獸之初生謂之鼻人之初生謂之首梁益謂鼻為初或謂之祖

巨斧

兗豫間謂蟾螂為巨斧

獨斷

漢 蔡邕

漢天子正號曰皇帝自稱曰朕臣民稱之曰陛下其言曰制詔史官記事曰上車馬衣服器械百物曰乘輿所在曰行在所所居曰禁中後曰省中印曰璽所至曰幸所進曰御其命令一曰策書二曰制書三曰詔書四曰戒書

皇帝皇王后帝皆君也上古天子庖犧氏神農氏稱皇堯舜稱帝夏殷周稱王秦承周末為漢驅除自以

蜀新

獨斷

德兼三皇功包五帝故并以為號漢高祖受命功德宜之因而不改也

王者至尊四號之別名

王畿內之所稱王有天下故稱王

天王諸夏之所稱天下之所歸往故稱天王

天子夷狄之所稱父天母地故稱天子

天家百官小吏之所稱天子無外以天下為家故稱

天家

天子正號之別名

皇帝至尊之稱皇者煌也盛德煌煌無所不照帝者諦也能行天道事天審諦故稱皇帝

朕我也古者尊卑共之貴賤不嫌則可同號之義也堯曰朕在位七十載皐陶與帝舜言曰朕言惠可底行屈原曰朕皇考此其義也至秦天子獨以為稱漢因而不改也

陛下者陛階也所由升堂也天子必有近臣執兵陳于陛側以戒不虞謂之陛下者羣臣與天子言不敢指斥天子故呼在陛下者而告之因卑達尊之意也

上書亦如之及羣臣士庶相與言曰殿下閣下執事之屬皆此類也

上者尊位所在也太史令司馬遷記事當言帝則依違但言上不敢滌瀆言尊號尊王之義也

乘輿出於律律曰敢盜乘輿服御物謂天子所服食者也天子至尊不敢滌瀆言之故托之于乘輿乘猶載也輿猶車也天子以天下爲家不以京師宮室爲常處則當乘車輿以行天下故羣臣託乘輿以言之或謂之車駕

天子自謂曰行在所猶言今雖在京師行所至耳巡狩天下所奏事處皆爲宮在京師曰奏長安宮在泰山則曰奏奉高宮唯當時所在或曰朝廷亦依違尊者所都連舉朝廷以言之也親近侍從官稱曰大家百官小吏稱曰天家

禁中者門戶有禁非侍御者不得入故曰禁中孝元皇后父大司馬陽平侯名禁當時避之故曰省中今宜改後遂無復言之者

璽者印也印者信也天子璽以玉螭虎紐古者尊卑

共之月令曰固封璽春秋左氏傳曰魯襄公在楚季  
武子使公冶問璽書追而與之此諸侯大夫印稱璽  
者也衛宏曰秦以前民皆以金玉爲印龍虎紐唯其  
所好然則秦以來天子獨以印稱璽又獨以玉羣臣  
莫敢用也

幸者宜幸也世俗謂幸爲僥倖車駕所至臣民被其  
德澤以僥倖故曰幸也先帝故事所至見長吏三老  
官屬親臨軒作樂賜食阜帛越巾刀佩帶民爵有級  
數或賜田租之半是故謂之幸皆非其所當得而得  
之王仲任曰君子無幸而有不幸小人有幸而無不  
幸春秋傳曰民之多幸國之不幸也言民之得所不  
當得故謂之幸然則人主必慎所幸也御者進也凡  
衣服加于身飲食入于口妃妾接于寢皆曰御親愛  
者皆曰幸

策書策者簡也禮曰不滿百丈不書于策其制長二  
尺短者半之其次一長一短兩編下附篆書起年月  
日稱皇帝曰以命諸侯王三公其諸侯王三公之薨  
于位者亦以策書誄謚其行而賜之如諸侯之策三

公以罪免亦賜策文體如上策而隸書以尺一木兩行唯此爲異者也

制書帝者制度之命也其文曰制詔三公赦令贖令之屬是也刺史太守相劾奏申下土遷書文亦如其徵爲九卿若遷京師近官則言官具言姓名其免若得罪無姓凡制書有印使符下遠近皆璽封尚書令印重封唯赦令贖令召三公詣朝堂受制書司徒印封露布下州郡

詔書者詔誥也有三品其文曰告某官官如故事是爲詔書羣臣有所奏請尚書令奏之下有制曰天子答之曰可若下某官云云亦曰詔書羣臣有所奏請無尚書令奏制字則答曰已奏如書本官下所當至亦曰詔

戒書戒敕刺史太守及三邊營官被敕文曰有詔敕某官是爲戒敕也世皆名此爲策書失之遠矣凡羣臣上書于天子者有四名一曰章二曰奏三曰表四曰駁議

章者需頭稱稽首上書謝恩陳事詣闕通者也

奏者亦需頭其京師官但言稽首下言稽首以聞其中者所請若罪法劾案公府送御史臺公卿校尉送謁者臺也

表者不需頭上言臣某言下言臣某誠惶誠恐頓首頓首死罪死罪左方下附曰某官臣某甲上文多用編兩行文少以五行請尚書通者也公卿校尉諸將不言姓大夫以下有同姓官別者言姓章曰報聞公卿使謁者將大夫以下至吏民尚書左丞奏聞報可表文報已奏如書凡章表皆啓封其言密事得皂囊

盛其有疑事公卿百官會議若臺閣有所正處而獨執異意者曰駁議駁議曰某官某甲議以爲如是下言臣愚戇議異其非駁議不言議異其合于上意者文報曰某官某甲議可

漢承秦法羣臣上書皆言昧死言王莽盜位慕古法去昧死曰稽首光武因而不改朝臣曰稽首頓首非朝臣曰稽首再拜公卿侍中尚書衣帛而朝曰朝臣諸營校尉將大夫以下亦爲朝臣

王者臨撫之別名天子曰兆民諸侯曰萬民

今之令長古之

諸侯百乘之家曰百姓百姓之家子男之國也

天子所都曰京師京水也地下之衆者莫過于水地

上之衆者莫過于人京大師衆也故曰京師也

京師天子之畿內千里象日月日月纏次千里

天子命令之別名一曰命出君下臣名曰命二曰令奉而行之名曰

令著之竹帛名曰政三曰政

天子父事天母事地兄事日姊事月常以春分朝日

于東門之外示有所尊訓人民事君之道也秋夕夕

月于西門之外別陰陽之義也

天子父事三老者適成于天地人也兄事五更者訓

于五品也更者長也更相代至五也能以善道改更

已也又三老老謂久也舊也壽也皆取首妻男女完

具者古者天子親袒割牲執醬而饋三公設几九卿

正履使者安車輓輪送迎而至其家天子獨拜于屏

其明旦三老詣闕謝以其禮過厚故也又五更或為

叟叟老稱與三老同義也

三代建正之別名夏以十三月為正十寸為尺律中

太簇言萬物始簇而生故以為正也殷以十二月為

正九寸爲尺律中太呂言陰氣太勝助黃鍾宣氣而  
萬物生故以爲正也周以十一月爲正八寸爲尺律  
中黃鍾言陽氣踵黃泉而出故以爲正也

三代年歲之別名唐虞曰載載歲也言一歲莫不覆  
載故曰載也夏曰歲一曰稔也商曰祀周日年

閏月者所以補小月之減日以正歲數故三年一閏  
五年再閏

天子諸侯后妃夫人之別名天子之妃曰后后之言  
後也諸侯之妃曰夫人夫之言扶也大夫曰孺人孺

之言屬也士曰婦人婦之言服也庶人曰妻妻之言  
齊也公侯有夫人有世婦有妻有妾皇后赤綬玉璽  
貴人緇綬金印緇綬色似綠

天子后立六宮之別名三夫人帝嚳有四妃以象后  
妃四星其一明者爲正妃三者爲次妃也九嬪夏后  
氏增以三三而九合十二人春秋天子一取十二夏  
制也二十七世婦殷人又增三九二十七合三十九  
人八十一御女周人上法帝嚳正妃又九九八十一  
增之合百二十人也天子一取十二女象十二月三



夫人九嬪諸侯一取九女象九州一妻八妾卿大夫一妻二妾士一妻一妾

王者子女封邑之差帝之女曰公主儀比諸侯帝之姊妹曰長公主儀比諸侯王異姓婦女以恩澤封者曰君比長公主

天子諸侯宗廟之別名左宗廟東曰左帝牲牢三月在外牢一月在中牢一月在明牢一月謂近明堂也三月一時已足肥矣徙之三月示其潔也右社稷西曰右宗廟社稷皆在庫門之內雉門之外天子三昭

三穆與太祖之廟七七廟一壇一墀曰考廟王考廟皇考廟顯考廟祖考廟皆月祭之諸侯二昭二穆與太祖之廟五五廟一壇一墀曰考廟王考廟皇考廟皆月祭之

大夫以下廟之別名大夫一昭一穆與太祖之廟三三廟一壇考廟王廟四時祭之也士一廟降大夫二也上士三廟一壇考廟王考廟亦四時祭之而已自立二祀曰門曰行下士一廟曰考廟王考無廟而祭之所謂祖稱曰廟者也亦立二祀與上士同府史以

下未有爵命號爲庶人及庶人皆無廟四時祭于寢也

周祧文武爲祧四時祭之而已去祧爲壇去壇爲墀有禱焉祭之無禱乃止去墀曰鬼壇謂築土起堂墀謂築土而無屋者也

薦考妣于適寢之所祭春薦韭卯夏薦麥魚秋薦黍豚冬薦稻鴈制無常牲取與新物相宜而已

天子之宗社曰泰社天子所爲羣姓立社也天子之社曰王社一曰帝社古者有命將行師必于此社授

以政尚書曰用命賞于祖不用命戮于社

諸侯爲百姓立社曰國社諸侯之社曰侯社

亡國之社古者天子亦取亡國之社以分諸侯使爲社以自儆戒屋之掩其上使不通天柴其下使不通地自與天地絕也而北向陰示滅亡也

大夫以下成羣立社曰置社大夫不得特立社與民族居百姓以上則共一社今之里社是也

天子社稷土壇方廣五丈諸侯半之

天子社稷皆太牢諸侯社稷皆少牢

天子爲羣姓立七祀之別名曰司命曰中霤曰國行  
曰國門曰泰厲曰戶曰竈

諸侯爲國立五祀之別名曰司命曰中霤曰國門曰  
國行曰公厲

大夫以下自立三祀之別名曰族厲曰門曰行

五祀之別名門秋爲少陰其氣收成祀之于門祀門  
之禮北面設主于門左樞戶春爲少陽其氣始出生  
養祀之于戶祀戶之禮南面設主于門內之西行冬  
爲太陰盛寒爲水祀之于行在廟門外之西扳壤厚

二尺廣五尺輪四尺北面設主于扳上

一作  
輓壤竈夏爲

太陽其氣長養祀之于竈祀竈之禮在廟門外之東  
先席于門奧西東設主于竈陔也中霤季夏之月土  
氣始盛其祀中霤霤神在室祀中霤設主于牖下也  
五方正神之別名東方之神其帝太昊其神勾芒南  
方之神其帝神農其神祝融西方之神其帝少昊其  
神蓐收北方之神其帝顓頊其神玄冥中央之神其  
帝黃帝其神后土

六神之別名風伯神箕星也其象在天能興風雨師

神畢星也其象在天能興雨明星神一曰靈星其象在天舊說曰靈星火星也一曰龍星火爲天田厲山氏之子柱及后稷能殖百穀以利天下故祠此三神以報其功也漢書稱高帝五年初置靈官祠后土祠位在壬地社神蓋共工氏之子勾龍也能平水土帝顓頊之世舉以爲土正天下賴其功堯祠以爲社凡樹社者欲令萬民加肅敬也各以其野所宜之木以名其社及其野位在未地稷神蓋厲山氏之子柱也柱能植百穀帝顓頊之世舉以爲田正天下賴其功

周棄亦播殖百穀以稷五穀之長也因以稷名其神也社稷二神功同故同堂別壇俱在未位上地廣博不可徧覆故封社稷露之者必受霜露以達天地之氣樹之者尊而表之使人望見則加畏敬也先農神先農者蓋神農之神神農作耒耜教民耕農至少昊之世置九農之官如左

春扈氏

扈止也

農正趣民耕種

鳥

夏扈氏農正趣民芸

除

亥切

秋扈氏農正趣民收斂

監切

冬扈氏農正趣民蓋

藏

黃切

棘扈氏農正常謂茅氏一曰掌人百果

丹切

行扈

氏農正晝為民驅鳥

皆皆

宵扈氏農正夜為民驅獸

嘖嘖

桑扈氏農正趣民養蠶

脂切

老扈氏農正趣民收麥

鷓鷃

疫神帝顓頊有三子生而亡去為鬼其一者居江水

是為瘟鬼其一者居若水是為魍魎其一者居人宮

室樞隅處善驚小兒于是命方相氏黃金四目蒙以

熊皮玄衣朱裳執戈揚楯常以歲竟十二月從百隸

及童兒而時儺以索宮中岐疫鬼也桃弧棘矢土鼓

鼓旦射之以赤丸五穀播酒之以除疾殃已而立桃

人葦索儋牙虎神荼鬱壘以執之儋牙虎神荼鬱壘

二神海中有度朔之山上有桃木蟠屈三千里卑枝

東北有鬼門萬鬼所出入也神荼與鬱壘二神居其

門主閱領諸鬼其惡害之鬼執以葦索食虎故十二

月歲竟常以先臘之夜逐除之也乃畫荼壘并懸葦

索于門戶以禦凶也

四代稱臘之別名夏曰嘉平殷曰清祀周曰大蜡漢

曰臘

五帝臘祖之別名青帝以未臘卯祖

青帝太昊木行

赤帝以

戌臘午祖

赤帝炎帝火行

白帝以丑臘酉祖

白帝少昊金行

黑帝以

辰臘子祖

黑帝顓頊  
項水行

黃帝以辰臘未祖

黃帝軒轅  
后土土行

天子大蜡八神之別名蜡之言索也祭曰索此八神而祭之也大同小異為位相對向祝曰土反其宅水歸其壑昆蟲毋作豐年若上歲取千百

先嗇

司嗇

農

郵表輟

貓虎

貓食田鼠虎食田豕迎其神而祭之

坊

水庸

昆蟲

五祀之別名

禮臣  
五義

法施于民則祀以死勤事則祀以

勞定國則祀能禦大災則祀能扞大患則祀

六號之別名神號尊其名更為美稱若曰皇天上帝

也鬼號若曰皇祖伯某祗號若曰后土地祗也牲號

牛曰一元大武羊曰柔毛之屬也齊號黍曰薌合梁

曰香其之屬也幣號玉曰嘉玉幣曰量幣之屬也

凡祭宗廟禮牲之別名牛曰一元大武豕曰剛鬣豚

曰膾肥羊曰柔毛鷄曰翰音犬曰羹獻雉曰疏趾兔

曰明視

凡祭號牲物異于人者所以尊鬼神也脯曰尹祭橐

魚曰商祭鮮魚曰艇祭水曰清滌酒曰清酌黍口薌

合梁曰香其稻曰嘉疏鹽曰鹹齶玉曰嘉玉幣曰量幣

大祝掌六祝之辭順祝願豐年也年祝求永真也告祝祈福祥也化祝弭災兵也瑞祝逆時雨寧風旱也策祝遠罪病也

宗廟所歌施之別名清廟一章八句洛邑既成諸侯朝見宗祀文王之所歌也維天之命一章八句告太平于文王之所歌也維清一章五句奏象武之所歌也烈文一章十三句成王卽政諸侯助祭之所歌也

天作一章七句祝先王公之所歌也昊天有成命一章七句郊祀天地之所歌也我將一章十句祀文王于明堂之所歌也時邁一章十五句巡守告祭柴望之所歌也執兢一章十四句祀武王之所歌也思文一章八句祀后稷配天之所歌也臣工一章十句諸侯助祭遣之于廟之所歌也噫嘻一章八句春夏祈穀于上帝之所歌也振鷺一章八句二王之後來助祭之所歌也豐年一章七句蒸嘗秋冬之所歌也有瞽一章十三句始作樂合諸樂而奏之所歌也潛一

章六句季冬薦魚春獻鮪之所歌也雍一章十六句  
禘太祖之所歌也載見一章十四句諸侯始見于武  
王廟之所歌也有客一章十三句微子來見祖廟之  
所歌也武一章七句奏大武周武所定一代之樂之  
所歌也閔予小子一章十一句成王除武王之喪將  
始卽政朝于廟之所歌也訪落一章十二句成王謀  
政于廟之所歌也敬之一章十二句羣臣進戒嗣王  
之所歌也小毖一章八句嗣王求忠臣助已之所歌  
也載芟一章三十一句春籍田祈社稷之所歌也良

耜一章二十三句秋報社稷之所歌也絲衣一章九  
句繹賓尸之所歌也酌一章九句告成大武言能酌  
先祖之道以養天下之所歌也桓一章九句師祭講  
武類禡之所歌也賚一章六句大封于廟賜有德之  
所歌也般一章七句巡狩祀四嶽河海之所歌也右  
詩三十一章皆天子之禮樂也

五等爵之別名三公者天子之相相助也助理天下  
其地方百里侯者侯也侯逆順也其地方百里伯者  
白也明白于德其地方七十里子者滋也奉天王之



恩德其地方五十里男者任也立功業以化民其地

方五十里 一云周制也

守者秦置也秦兼天下置三川守伊河洛也漢改曰

河南守武帝會曰太守世祖都洛陽改曰正

諸侯大小之差諸侯王皇子封為王者稱曰諸侯王

徹侯羣臣異姓有功封者稱曰徹侯避武帝諱改曰

通侯或曰列侯也朝侯諸侯有功德者天子特命為

諸侯位次諸卿

王者耕籍田之別名天子二推三公五推卿諸侯九

推

三代學校之別名夏曰校殷曰序周曰庠天子曰辟

雍謂流水四面如壁以節觀者諸侯曰頰宮頰言半

也義亦如上

五帝三代樂之別名黃帝曰雲門顓頊曰六莖帝嚳

曰五英堯曰咸池舜曰大韶一曰大招夏曰大夏殷

曰大濩周曰大武天子八佾八八六十四人八者象

八風所以風化天下也公之樂六佾象六律也侯之

樂四佾象四時也

朝士卿朝之法左九棘孤卿大夫位也羣臣在其後  
右九棘公侯伯子男位也羣吏在其後三槐三公之  
位也州長衆庶在其後

四代獄之別名唐虞曰士官史記曰臯陶爲理尚書  
曰臯陶作士夏曰均臺周曰囹圄漢曰獄

四夷樂之別名王者必作四夷之樂以定天下之歡  
心祭神明和而歌之以管樂爲之聲東方曰鞀南方

曰任西方曰侏離

一作禁

北方曰禁

一作昧

易曰帝出乎震震者木也言宓犧氏始以木德王天

下也木生火故宓犧氏沒神農氏以火德繼之火生  
土故神農氏沒黃帝以土德繼之土生金故黃帝沒  
少昊氏以金德繼之金生水故少昊氏沒顓頊氏以  
水德繼之水生木故顓頊氏沒帝嚳氏以木德繼之  
木生火故帝嚳氏沒帝堯氏以火德繼之火生土故  
帝舜氏以土德繼之土生金故夏禹氏以金德繼之  
金生水故殷湯氏以水德繼之水生木故周武以木  
德繼之木生火故高祖以火德繼之

伏羲爲太昊氏炎帝爲神農氏黃帝爲軒轅氏少昊

為金天氏顓頊為高陽氏帝嚳為高辛氏帝堯為陶  
唐氏帝舜為有虞氏夏禹為夏后氏湯為殷商氏

武王為周

高祖為漢

高帝 在位十二年 生惠帝

惠帝 七年 無後

呂后攝政 八年立惠帝弟 代王為文帝

文帝 二十三年 生景帝

景帝 十六年 生武帝

武帝 五十四年 生昭帝

昭帝 十三年無後立先 衛太子孫為宣帝

宣帝 三十五年 生元帝

元帝 十六年 生成帝

成帝 二十六年無後立弟 定陶王子為哀帝

哀帝 五年無後立弟中 山王子為平帝

平帝 五年 莽篡

王莽 十六年 聖公殺之

聖公 二年 光武殺之

蜀新

七九

光武 三十三年 生明帝

明帝 十八年 生章帝

章帝 十三年 生和帝

和帝 十七年 生殤帝

殤帝 一年無後取清河王子為安帝

安帝 十九年 生順帝

順帝 十九年 生沖帝

沖帝 一年無後取和帝孫安樂王子為質帝

質帝 一年無後取河間敬王孫蠡吳侯子為桓帝

桓帝 二十一年無後取解犢侯子立為靈帝

靈帝 二十二年生史侯董卓殺之立史侯弟陳留王為帝

從高帝至桓帝三百八十六年除王莽劉聖公三百

六十六年從高祖乙未至今壬子歲四百一十年呂

后王莽不入數高帝以甲午歲即位以乙未為元

帝嫡妃曰皇后帝母曰皇太后帝祖母曰太皇太后

其衆號皆如帝之稱秦漢以來少帝即位后代而攝

政稱皇太后詔不言制漢興惠帝崩少帝弘立太后

攝政哀帝崩平帝幼孝元王皇后以太皇太后攝政

和帝崩殤帝崩安帝幼和熹鄧皇后攝政孝順崩沖  
帝質帝桓帝皆幼順烈梁后攝政桓帝崩今上即位  
桓思竇后攝政后攝政則后臨前殿朝羣臣后東面  
少帝西面羣臣奏事上書皆為兩通一詣太后一詣  
少帝

二世三世四世五世六世七世八世九世十世  
十一世十二世十三世十四世十五世十六世

中山子  
孝王帝  
定陶哀  
共王帝

辰史宣元武  
太皇帝帝帝  
子孫帝帝帝

高祖 惠文景武昭  
帝帝帝帝帝

長沙春陵鬱林鉅鹿南  
光明章和殤  
定王節侯太守都尉令 武帝帝帝帝

濟和安

孝王帝

順 沖  
帝 帝

千乘樂安

渤海 賁  
帝 帝

貞王夷王

孝王 帝

河間蠡吾

桓

孝王侯翼

帝

解續 亭侯 叔

解續 靈獻  
亭侯 帝 帝

文帝弟雖在三禮兄弟不相為後文帝即高祖子于  
惠帝兄弟也故不為惠帝後而為第二宣帝弟次昭

帝史皇孫之子於昭帝爲兄孫以係祖不得上與父  
齊故爲七世光武雖在十二于父子之次于成帝爲  
兄弟于哀帝爲諸父于平帝爲父祖皆不可爲之後  
至元帝于光武爲父故上繼元帝而爲九世故河圖  
曰赤九世會昌謂光武也十世以光謂孝明也十一  
以興謂孝章也成雖在九哀雖在十平雖在十一不  
稱次

宗廟之制古學以爲人君之居前有朝後有寢終則  
前制廟以象朝後制寢以象寢廟以藏主列昭穆寢  
有衣冠几丈象生之具總謂之宮月令曰先薦寢廟  
詩云公侯之宮頌曰寢廟奕奕言相連也是皆其文  
也古不墓祭至秦始皇出寢起居于墓側漢因而不  
改故今陵上稱寢殿有起居衣冠象生之備皆古寢  
之意也居西都時高帝以下每帝各別立廟月備法  
駕遊衣冠又未定迭毀之禮元帝時丞相匡衡御史  
大夫貢禹乃以經義處正罷遊衣冠毀先帝親盡之  
廟高帝爲太祖孝文爲太宗孝武爲世宗孝宣爲中  
宗祖宗廟皆世世奉祠其餘惠景以下皆毀五年而

稱殷祭猶古之禘祫也殷祭則及諸毀廟非殷祭則祖宗而已光武中興都洛陽乃合高祖以下至平帝為一廟藏十一帝主于其中元帝于光武為禰故雖非宗而不毀也後嗣遵承遂常奉祀光武舉天下以再受命復漢祚更起廟稱世祖孝明臨崩遺詔遵儉毋起寢廟藏主于世祖廟孝章不敢違是後遵承藏主于世祖廟皆如孝明之禮而園陵皆自起寢廟孝明日顯宗孝章曰肅宗是後踵前孝和曰穆宗孝安曰恭宗孝順曰敬宗孝桓曰威宗唯殤沖質三少帝

皆以未踰年而崩不列于宗廟四時就陵上祭寢而已今洛陽諸陵皆以晦望二十四氣伏社臘及四時曰上飯大官送用園令食監典省其親陵所宮人隨鼓漏理被枕具盥水陳嚴具天子以正月五日畢供後上原陵以次周徧公卿百官皆從四姓小侯諸侯家婦凡與先帝先后有瓜葛者及諸侯王大夫郡國計吏匈奴朝者西國侍子皆會尚書官屬陞西除下先帝神座後大夫計吏皆當軒下占其郡穀價四方災異欲皆使先帝魂神具聞之遂于親陵各賜計吏

而遣之正月上丁祠南郊禮畢次北郊明堂高祖廟  
世祖廟謂之五供五供畢以次上陵也四時宗廟用  
牲十八太牢皆有副俸西廟五主高帝文帝武帝宣  
帝元帝也高帝爲高祖文帝爲太宗武帝爲世宗宣  
帝爲中宗其廟皆不毀孝元功薄當毀光武復天下  
屬弟于元帝爲子以元帝爲禰廟故列于祖宗後嗣  
因承遂不毀也

東廟七主光武明帝章帝和帝安帝順帝桓帝也光  
武爲世祖明帝爲顯宗章帝爲肅宗和帝爲穆宗安

帝爲恭宗順帝爲敬宗桓帝爲威宗廟皆不毀少帝  
未踰年而崩皆不入廟以陵寢爲廟者三殤帝康陵  
沖帝懷陵質帝靜陵是也追號爲后者三章帝宋貴  
人曰敬隱后葬北陵安帝祖母也清河孝德皇后安  
帝母也章帝梁貴人曰恭懷后葬西陵和帝母也安  
帝張貴人曰恭敏后葬北陵順帝母也  
兩廟十二主三少帝三后故用十八太牢也

漢家不言禘祫五年而再殷祭則西廟惠帝景昭皆  
別祠成哀平三帝以非光武所後藏主長安故高廟



四時祠于東廟京兆尹侍祠衣冠車服如太常祠行  
陵廟之禮順帝母故云姓李或姓張高祖得天下而  
父在上尊號曰太上皇不言帝非天子也孝宣繼孝  
昭帝其父曰史皇孫祖父曰衛太子太子以罪廢及  
皇孫皆死宣帝但起園陵長承奉守不敢加尊號于  
祖父也光武繼孝元亦不敢加尊號于祖父也世祖  
父南頓令曰皇考祖鉅鹿都尉曰皇祖曾祖鬱林太  
守曰皇曾祖高祖舂陵節侯曰皇高祖起陵廟置章  
陵以奉祠之而已至殤帝崩無子弟安帝以和帝兄  
子從清河王子卽尊號依高帝尊父爲太上皇之義  
追號父清河王曰孝德皇順帝崩沖帝無子弟立樂  
安王子是爲質帝帝偏於順烈梁后父大將軍梁冀  
未得尊其父而崩桓帝以蠡吾侯子卽尊位追尊父  
蠡吾先侯曰孝崇皇母匡太夫人曰孝崇后祖父河  
間孝王曰孝穆皇祖母妃曰孝穆后桓帝崩無子今  
上卽位追尊父解犢侯曰孝仁皇母董夫人曰孝仁  
后祖父河間敬王曰孝元皇祖母夏妃曰孝元后  
天子大社以五色土爲壇皇子封爲王者受天子之

社土以所封之方色東方受青南方受赤他如其方  
色直以白茅授之各以其所封方之色歸國以立社  
故謂之受茅土漢興以皇子封爲王者得茅土其他  
功臣及鄉亭他姓公侯各以其戶數租入爲限不受  
茅土亦不立社也

漢制皇子封爲王者其實古諸侯也周末諸侯或稱  
王而漢天子自以皇帝爲稱故以王號加之總名諸  
侯王子弟封爲侯者謂之諸侯羣臣異姓有功封者  
謂之徹侯後避武帝諱改曰通侯法律家皆曰列侯

功德優盛朝廷所異者賜位特進位在三公下其次  
朝侯位次九卿下皆平冕文衣侍祠郊廟稱侍祠侯  
其次下士但侍祠無朝位次小國侯以肺腑宿衛親  
公王子孫奉墳墓在京者亦隨時見會謂之猥朝侯  
也

巡狩校獵還公卿以下陳洛陽都亭前街上乘輿到  
公卿下拜天子下車公卿親識顏色然後還宮古語  
曰在車則下惟此時施行

正月朝賀三公奉璧上殿向御座北面太常贊曰皇

帝爲君興三公伏皇帝坐乃進璧古語曰御坐則起此之謂也舊儀三公以下月朝後省常以六月朔十月朔旦朝後又以盛暑省六月朝故今獨以爲正月十月朔朝也冬至陽氣始起麋鹿解角故寢兵鼓身欲寧志欲靜不聽事送迎五日臘者歲終大祭縱吏民宴飲非迎氣故但送不迎正月歲首亦如臘儀冬至陽氣起君道長故賀夏至陰氣起君道衰故不賀鼓以動衆鍾以止衆夜漏盡鼓鳴則起晝漏盡鍾鳴則息也

天子出車駕次第謂之鹵簿有大駕有小駕有法駕大駕則公卿奉引大將軍參乘太僕御屬車八十一乘備千乘萬騎在長安時出祠天于甘泉備之百官有其儀注名曰甘泉鹵簿中興以來希用之先帝時時備大駕上原陵他不常用唯遭大喪乃施之法駕公卿不在鹵簿中唯河南尹執金吾洛陽令奉引侍中參乘奉車郎御屬車三十六乘北郊明堂則省諸副車小駕祠宗廟用之每出太僕奉駕上鹵簿于尚書侍中中常侍侍御史王者郎令史皆執注以督整

諸軍車騎春秋上陵令又省于小駕直事尚書一人  
從令以下皆先行

法駕上所乘曰金根車駕六馬有五色安車五色立  
車各一皆駕四馬是謂五時副車俗人名之曰五帝  
車非也又有戎立車以征伐三蓋車名耕根車一名  
芝車親耕籍田乘之又有蹋猪車幔輪有畫田獵乘  
之綠車名曰皇孫車天子孫乘之以從

凡乘輿車皆羽蓋金華瓜黃屋左纛金鏤方鉉繁纓  
重轂副牽

黃屋者蓋以黃爲裏也

左纛者以羗牛尾爲之大如斗在最後左駢馬驥上  
金驥者馬冠也高廣各四寸如玉華形在馬驥前方  
鉉者鐵廣數寸在驥後有三孔插翟尾其中繁纓在  
馬膺前如索帚者是也

重轂者轂外復有一轂施牽其外乃復設牽施銅金  
鏤形如緹亞飛軫以緹油廣八寸長注地左畫蒼龍  
右白虎繫軸頭今二千石亦然但無畫耳

前驅有九旂雲罕闕戟皮軒鑿旗車皆大夫載鑿旗

者編羽毛引繫橦旁俗人名之曰雞翹車非也後有金鉦黃鉞黃門鼓車古者諸侯貳車九乘秦滅九國兼其車服故大駕屬車八十一乘也尚書御史乘之最後一車懸豹尾以前皆皮軒虎皮爲之也

永安七年建金根耕根諸御車皆一轅或四馬或六馬金根箱輪皆以金鑄正黃兩臂前後刻金以作龍虎鳥龜形上但以青纁爲蓋羽毛無後戶

冕冠周曰爵弁殷曰皐夏曰收皆以三十升漆布爲殼廣八寸長尺二寸加爵冕其上周黑而赤如爵頭

之色前小後大殷黑而微白前大後小夏純黑而赤前小後大皆有收以持笄詩曰常服黼皐禮朱干玉戚皐而舞大武周書曰王與大夫盡弁古皆以布中古以絲孔子曰麻冕禮也今也純儉漢雲翹冠樂祠天地五郊舞者服之冕冠垂旒周禮天子冕前後垂延朱綠藻有十二旒公侯大夫各有差別漢興至孝明帝永平二年詔有司採尚書皋陶篇及周官禮記定而制焉皆廣七寸長尺二寸前圓後方朱綠裏而玄上前垂四寸後垂三寸繫白玉珠於其端是爲十

二旒組纓如其綬之色三公及諸侯之祠者朱綠九旒青玉珠卿大夫七旒黑玉珠皆有前無後組纓各視其綬之色旁垂黠纒當耳郊天地祠宗廟祀明堂則冠之衣黼衣佩玉佩履絢履孔子曰服周之冕鄙人不識謂之平天冠

天子冠通天冠諸侯王冠遠遊冠公侯冠進賢冠公王三梁卿大夫尚書二千石博士冠兩梁千石六百石以下至小吏冠一梁天子公卿特進朝侯祀天地明堂皆冠平冕

天子十二旒三公九旒諸侯卿七旒其纓與組各如其綬之色衣玄上纁下日月星辰山龍華蟲祠宗廟則長冠裼玄其武官太尉以下及侍中常侍皆冠惠文冠侍中常侍加貂蟬御史冠法冠謁者冠高山冠其鄉射行禮公卿冠委貌衣玄端執事者皮弁服宮門僕射冠却非大樂郊社祝舞者冠建華其狀如婦人纓簏迎氣五郊舞者所冠亦爲冕車駕出後有巧士冠其冠似高山冠而小

幘者古之卑賤執事不冠者之所服也孝武帝幸館

陶公主家召見董偃偃傳青襦綠幘主贊曰主家庖  
人臣偃昧死再拜謁上爲之起乃賜衣冠引上殿董  
仲舒武帝時人其上兩書曰執事者皆赤幘知皆不  
冠者之所服也元帝額有壯髮不欲使人見始進幘  
服之羣臣皆隨焉然尚無巾如今半幘而已王莽無  
髮乃施巾故語曰王莽禿幘施是冠進賢者宜長耳  
冠惠文者宜短耳各隨所宜

通天冠天子常服漢服受之秦禮無文遠遊冠諸侯  
王所服展筓無山禮無文高山冠齊冠也一曰劍注

高九寸鐵爲卷梁不展筓無山秦制行人使官所冠  
今謁者服之禮無文太傅胡公說曰高山冠蓋齊工  
冠也秦滅齊以其君冠賜謁者

進賢冠文官服之前高七寸後三寸長八寸公侯三  
梁卿大夫尚書博士兩梁千石八百石以下一梁漢  
制禮無文

法冠楚冠也一曰柱後惠文冠高五寸以纚裹鐵柱  
卷秦制執法服之今御史廷尉監平服之謂之獬豸  
冠獬豸獸名蓋一角今冠兩角以獬豸爲名非也太

傳胡公說曰左氏傳有南冠而縈者國語曰南冠以如夏姬是知南冠蓋楚之冠秦滅楚以其君冠賜御史武冠或曰繁冠今謂之大冠武官服之侍中中常侍加黃金附貂蟬鼠尾飾之太傅胡公說曰趙武靈王效胡服始施貂蟬之飾秦滅趙以其君冠賜侍中齊冠或曰長冠竹裏以纒高七寸廣三寸形制如板高祖冠以竹皮爲之謂之劉氏冠楚制禮無文鄙人不識謂之鵠尾冠

建華冠以鐵爲柱卷貫大珠九枚今以銅爲珠形制似縷籠記曰知天文者服之左傳曰鄭子臧好聚鷖冠前圖以爲此制是也天地五郊明堂月令舞者服之

方山冠以五采縠爲之漢祀宗廟大享八佾樂五行舞人服之衣冠各從其行之色如其方色而舞焉術士冠前圓吳制邈迤四重趙武靈王好服之今者不用其說未聞

巧士冠高五寸要後相通埽除從官服之禮無文却非冠宮門僕射者服之禮無文



樊噲冠漢將軍樊噲造次所冠以入項籍營廣七寸  
前出四寸司馬殿門大護衛士服之

却敵冠前高四寸通長四寸後高三寸監門衛士服  
之禮無文

珠冕爵卑收通天冠進賢冠長冠緇布冠委貌冠皮  
弁惠文冠古者天子冠所加者其次在漢禮

帝謚

違拂不成曰隱 靖民則法曰黃 翼善傳聖曰堯

仁聖盛明曰舜 殘人多壘曰桀 殘義損善曰紂

慈惠愛親曰孝 愛民好與曰惠 聖善同文曰宣

聲聞宣遠曰昭 克定禍亂曰武 聰明睿智曰叅

溫柔聖善曰懿 布德執義曰穆 仁義說民曰元

安仁立政曰神 布綱治紀曰平 亂而不損曰靈

保民耆艾曰明 辟土有德曰襄 貞心大度曰匡

大慮慈民曰定 知過能改曰恭 不生其國曰考

一德不懈曰簡 夙興夜寢曰敬 清白自守曰貞

柔德好衆曰靖 安樂治民曰康 小心畏忌曰僖

中身早折曰悼 慈仁和民曰順 好勇致力曰莊

恭人短折曰哀 在國逢難曰愍 名實過爽曰繆  
壅遏不通曰幽 暴虐無親曰厲 致志大圖曰景  
辟土兼國曰桓 經緯天地曰文 執義揚善曰懷  
短折不成曰殤 去禮遠衆曰場 怠政外交曰攜  
治典不敷曰斫一作震

臆乘

宋楊伯喈

臆乘

經史字音經史中字註音韻世人流傳訛舛不以爲

嫌談話及散文中用之故無害若夫對偶與夫押韻

詎可不審哉今聊疏數字 魁梧梧去聲西漢 救梧梧音悟項

羽膠膠上聲 榘榘上獲切 隱几隱去聲孟

粟馬傳 秣馬也西漢匈奴傳云以爲漢兵不能至乃粟

馬注云以粟稱馬蓋用詩鴛鴦篇乘馬在廐摧之秣  
之注秣乘也前摧之用粟字已奇注又云無事則委

意乘

之以筮有事乃予之以穀若筮馬穀馬尤奇

枉渚岐注陸士龍荅張士然詩通波激枉渚五臣注  
枉渚是今曲池之義楚辭九章云發枉渚又小灣曰  
枉渚郭璞江賦曰音岐成渚云岐山岸曲處江水潮  
因曲成渚此又岐渚也

思牢竹南番思牢國產竹質甚澁可以礪指甲唐崔  
鷟詩云一自出輕芒皚皚落微雪又李商隱射魚曲  
云思牢弩箭磨清石綉額蠻渠三虎力是知亦可作  
箭今東廣新州有這種製琴樣爲礪甲之具但微滑

當以酸漿漬之過信則澁後視字書六書豪韻笏字  
下註云篋笏竹名淮南子云女夷鼓吹以思天和以  
長穀禽鳥草木註云女夷主春夏長養之神也郭璞  
江賦云水夷倚浪以傲睨注云水仙人也

鼎卦雉膏鼎卦雉膏不食云美也黃山谷詩數面欣  
羊脾論詩喜雉膏乃借用美之意唐張演先有詩云  
雉膏美景在藜陰紅葢丹跗次第尋羊脾卽夷狄傳  
曰入烹羊脾熟東方已明說文曰未戴角曰膏

衢尊明尊人皆用之淮南子云聖人之道猶中衢而

致尊邪注云道通謂之衢尊酒器也六尊爲衢尊人絕未用晁無咎和東坡梅詩云一篇尚可三致意聽人酌去如衢尊蓋用此也

柳花柳絮柳花與柳絮迥然不同生於葉間成穗作鵝黃色者花也花旣褪就帶結實其實之熟亂飛如綿者絮也古今吟咏往以絮爲花以花爲絮畧無分別可發一笑杜工部詩有雀啄江頭黃柳花又有坐憎柳絮白於綿之句則花與絮不同顯然可見又曰糝徑楊花鋪白氈得非又一時鹵莽而然邪

墨墨墨無也新序晉平公閒居師曠侍坐平公曰子生無目朕甚矣子之墨墨也曠對曰國有五墨墨而不危者未之有也臣之墨墨眇墨耳何害乎國家哉棹磬內則舅姑若使介婦毋敢敵偶於冢婦不敢並行不敢並命不敢並坐注云不敢棹磬齊人以絞許爲棹磬崔云北海人以相激事爲棹磬棹徒釣反科頭俗謂不冠謂科頭此二字出史記張儀傳注云謂不着兜鍪入敵

朝定真冷契丹主聞唐莊宗爲亂兵所害哭曰我朝

定猶華言朋友也真冷遺命也出莊子山木篇桑雥  
曰舜之將死真冷禹曰汝戒之哉形莫若緣情莫若  
率注冷曉也謂以真道曉語禹也

司馬遷言李陵轉鬪千里矢盡道窮士張空拳漢書  
文穎註曰拳弓弩拳也師古曰拳去權反字與蔡同  
又音眷李善注文選援李登聲類云拳或作捲言兵  
已盡但張空拳以擊耳桓寬塩鐵論曰陳勝奮空捲  
而破百萬之軍顏師古讀爲拳者謬矣拳則屈指不  
當言張陵時矢盡故張弩之空弓非手拳已今流俗

謂奮空拳蓋以拳手之拳則失之矣

容齋隨筆備載樂天詩中字音異處蒙嘗暇隙徧閱  
集中如四十著緋軍司馬司作入聲四絃不似琵琶  
聲琵琶字作入聲爲問長安月誰教不相離相字上聲  
紅樓許住否樓鑰請不用否請字並作平聲池通淺  
沮溝沮秋夜切歸來無可可霑衣下可字可紇切穿衣  
妨寬袖妨字作去聲如此之類意其爲方言或一時  
借用耳政如少陵詩會須上番看成竹番字作上聲  
恰似春風相欺得相字作入聲其義一也若曰已絃

趣數彈數字從速切恐如孟子數畧不入洿池又曰  
嵬峩字並上聲恐如韓文聖德頌嶽嶽嶽嶽音  
我又曰捫腹方果然果字音顛此却正用莊子逍遙  
遊腹猶果然注若火切又曰荅然無所有荅音塔亦  
正用莊子齊物南郭子綦嗒然似喪其偶嗒字吐荅  
切又詩曰作底歡娛過此夜作音做正如韓文方橋  
如此做又曰梧讌喜過喜字去聲此史中多用之如  
漢陳遵傳道大喜之又十八人名空一人空字去聲  
正如選詩潭影空人心又云司馬人間冗長官長字  
去聲正用陸機文賦無故取乎冗長是也又有非本  
韻而叫韻呼者乃方言耳外有盡君花下醉青春盡  
字音津上聲窻銀中貴帶窻字去聲飄然轉旋迺雲  
程旋字去聲匹如元是九江人匹字去聲醉依香枕  
坐依字烏皆切却未知所據候扣博聞者

茶名茶之所產六經載之詳矣獨異美之名未備謝  
氏論茶曰此丹丘之仙茶勝烏程之御舞不止味同  
露液白况霜華豈可爲酪蒼頭便應代酒從事楊衍  
之作洛陽伽藍記日食有駱奴指茶爲酪粥之奴也

杜牧之詩山寔東南秀茶稱瑞草魁皮日休詩十盆  
前臯盧曹鄴詩劍外尤華美施肩吾詩茶爲滌煩子  
酒爲忘憂君此見於詩文者若南越志若苦澁爲之  
果羅北苑曰葉布絕品豫章曰白露曰白茅南劍曰  
石花曰錢芽東川曰獸目湖常具白茶筍壽州曰黃  
弟福問曰生第露第岳陽曰含膏外此無多頗疑似  
者不書若蟾背蝦須鵲舌蠟眼瑟瑟歷霏霏靄及鼓  
浪湧泉琉璃眼碧玉池又皆茶事中天然偶字也

丈二尺一今俗語丈二尺一之類亦有所本前漢匈

奴傳尺一牘尺二寸牘嚴加傳丈二之組後漢陳蕃

傳尺一選舉李雲傳一尺一并用考記注芟長丈二

杜少陵詩同歸尺五天容齋隨筆畧載今詳書之

責負漢高帝紀折券棄負師古注次簡牘爲契券折

毀之棄其所負其谷永傳起責分利愛謝師古注曰

古富貴有錢於他人次取利息今之人謂放債取償

蓋本諸此殊不知周禮天官小宰聽稱責以傳別注

稱責爲貸子傳別謂券也舉此言之則起責之說其

來尚矣

續釋常談常引白樂天鷓鴣之句解未得其似鷓鴣  
鷓之鷓世多寫爲鷓殊不知乃鴨字接丁度集韻鷓  
字在入聲三十三狎韻內與鴨字一同若鷓屬當從  
鷓在下平聲二十二覃韻與鷓鷓鷓鷓一同

雲族莊子云雲氣不待族而雨族聚也未聚而雨言  
澤少也李義山雪賦云雲市飄蕩當從於月月窟浙  
瀝合隨於雲市云族云市亦奇字

宰相稱號史傳載居相位妍醜之稱如漢袁盎呼申  
屠嘉曰愚相公孫弘贊曰儒相田千秋曰車丞相張

蒼贊曰名相翟方進曰通明相後漢杜林曰任職相  
晉謝安曰風流宰相武后呼杜景佺憲宗稱李絳曰  
曰真宰相唐盧懷慎曰伴食宰相蘇環蘇頲贊曰再  
世爲賢宰相關播曰盲宰相楊再思曰癡宰相本朝  
李沆曰聖相丁謂曰鷓相杜衍曰清白宰相陳升之  
曰筌相蔡確曰三旨丞相呼人爵之崇莫若秉軸淑  
慝之行皆得而議焉不可不謹也

古人自以公稱者獨范蠡曰陶朱公人號之者皆諸  
葛恢曰黑頭公宋沈慶之羣蠻號曰蒼頭公梁張綰



曰百六公齊何戡曰小斯楮公後魏于栗碑曰黑稍  
公古彌曰筆頭公北齊訢惇曰長鬣公齊鬣公崔日謙  
曰白鬚公後周韋瓊帝呼曰逍遙公唐李德裕稱牛  
僧孺曰大牢公

若翁號則漢田蚡為竇嬰曰一禿翁北齊武成帝小  
字曰乞翁唐盧從愿帝稱曰多白翁竇鞏人號曰囁  
嚅翁陸羽自稱曰桑苧翁杜牧自號曰樊川翁本朝  
黃魯直自號涪翁張師雄人嘲之曰蜜翁

郎如晉桓冲小字曰買得郎人稱吳周瑜曰周郎晉  
謝道韞稱夫王凝之曰王郎何晏曰何郎粉郎潘岳  
曰潘郎檀郎宋玉僧虔曰王郎齊江教曰江郎劉顯  
父曰劉郎梁顧協曰顧郎北齊盧師道曰盧郎袁聿  
修曰清郎後周獨孤信曰獨孤郎隋滕穆王曰楊郎宇  
文鼎曰宇文王郎唐明皇曰三郎張昌宗曰六郎元  
結曰漫郎錢起曰錢郎程元報曰十郎蕭悅曰蕭郎  
劉禹錫自稱曰劉郎五季閩王王審知曰白馬三郎  
乃皆郎稱也

如晉王敦曰可兒司馬曰犬子唐白居易姪曰羅兒

龜兒皆是小字也後漢賈復稱其子曰大宛兒崔暹  
曰癩兒人稱者漢東方朔曰偷桃小兒祖蜀譙周曰  
長兒晉王衍呼裴逸曰白眼兒山濤稱王衍曰寧馨  
兒後魏長孫業諸子曰鐵小兒營曰聖小兒唐楊儉  
蘇特曰黃面兒五季李業曰僕羅兒李信曰牧羊兒  
乃皆兒稱也

以童得名則漢中軍曰終童後漢杜安晉潘岳唐李  
百藥俱曰竒童齊鬱林王曰蕪童

以奴得名晉桓嗣曰豹奴王濛曰阿奴石崇曰齊奴  
潘岳曰檀奴後漢古弼帝稱曰齊奴孫騰曰僧奴皆  
小字也晉陸機人罵曰貉奴明帝人號曰鮮卑奴宋  
廢帝稱父武帝曰麟奴後漢古弼帝稱曰筆頭奴唐  
顏杲卿罵安祿山曰牧羊羯奴本朝梅聖俞呼謝師  
直曰錦衣奴

魄莫物之虛浮而不堅實者俗謂之魄莫嘗疑其無  
據及觀內則去其皷注云皮肉之上魄莫魄普各反  
莫音漠皷音闡膜也

俗謂娶婦曰索妻關羽傳孫權遣使索羽女爲子婦

有隋書太子勇傳獨孤后曰爲伊索得元家女索妻  
之語蓋本諸此後漢明帝永平四年詔京師冬無宿  
雪春不渙水注云言無暄潤之氣何平叔景福殿云  
冬不淒寒夏無炎燁國語亦云火無炎燁

俗稱果核中子曰仁或曰人相傳如此於義未明余  
謂當以仁是蓋仁者生意之所寓謂百果得此爲發  
生之基

擊鮮世多用烹鮮字未若前漢陸賈傳曰數擊鮮毋  
久溷汝爲也注云擊殺鮮字美擊鮮二字爲勝劉汾

注引史記云數見不鮮謂言人之常情頻見則不美  
又引馬公傳不鮮謂漢人語而史記本傳注云不鮮  
之義乃必令鮮美作食莫令見鮮之不語按馬宮三  
公之位鼎足承君不有鮮明風守無以居位如是則  
人與所援不同未知孰是尚書益稷篇旣益奏庶鮮  
食註云鳥獸之食也無逸篇惠鮮鰥寡言窮民垂首  
喪氣文王之惠綏莫不鮮鮮然有生意鮮字鮮惠亦  
奇

莊馘王仲宣從軍詩館宅克廬里女士滿莊馘李善

意

注引韓詩肅肅兔且施於中廕爾雅曰六達謂之莊九達謂之達說文達或作廕故毛詩兔且云施于中達莊廕蓋衢道之稱也

賈區胡建傳時監軍御史爲姦北軍穿垣以爲賈區師古曰坐賣曰賈古之爲區也小室之名若今小菴屋之類衛士之屋謂之區廬宿衛宮衛士稱爲區士也

行第前輩以第行稱多見之詩少陵稱謫仙爲十二鄭虔爲鄭十八嚴武爲嚴八鄭賁爲鄭十八蘇溪爲

蘇四張建封爲張十三唐診爲唐十五裴虬爲裴二

李御爲十一文公稱王涯爲王二十李建爲李十一

李程爲李二十崔立之爲崔一十六熊署爲熊十一

熊籍爲熊十八李正封爲李二十八馮宿爲馮十七

侯喜爲侯十一柳州稱韓文公爲韓十八劉禹錫謂

元稹爲元九又韋蘇州稱李澹爲李十九歐陽瞻稱

徐晦爲徐十八錢起稱李勣爲李四李勉爲李七嚴

父高適俱稱少陵爲杜二樂天稱劉夫敦爲劉三十

二李大畧爲李二十王質夫爲王十八崔元亮爲崔

十八李義山稱社勝爲杜二十七李潘爲李十七趙滂爲趙十五令狐絢爲令狐八高適稱張旭爲張九陳子昂稱王兢無爲无二韋虛乙爲韋五趙真固爲趙六李崇嗣爲李三儲光義稱王維爲王十三皇甫毋稱柳柳州爲柳八鄭堪爲鄭三孟浩然稱張千容爲張八王摩詰稱韋穆爲韋十八山谷稱東坡爲蘇二後山稱少游爲秦七少游稱后山爲陳三山谷爲黃九

浹辰浹日左傳成公九年云浹辰之間楚克其二都辰指十二辰自子至亥也周禮天官云浹日而歛之以甲至甲爲浹日凡十一日也

**鬻爵**事物紀元載鬻爵始於漢文帝受晁錯言令人入粟與官及援武帝靈帝事殊不知秦始皇時蝗蔽天下詔百姓納粟千石拜爵一級蓋又在漢文之前也

**行李**左傳一介行李杜預曰行李使人通聘問者按古文使字從山从人从子豈悞以使字爲李字耶出九山谷詩云肉食傾人如出九注引律詩博戲賤

物並停止出九和合者各令衆五日益博徒勝則八  
十其負則出僕止以九云

絕字之義絕字義訓不同如子絕四者無也絕筆於  
獲麟之一句者止也韋編三絕者斷也絕妙好辭者  
竒也絕類離倫者冠也超絕物表者超也物倫已絕  
者息也相望遼絕者遠也烽烟始絕者熄也絕壁蒼  
蒼者峭極也意好殆絕者盡也絕江海者橫渡也前  
漢武帝紀載衛將軍絕幕者謂直度匈奴沙土之界  
也

芥蒂世稱芥蒂或芥蒂徃徃字音皆未詳按文選張  
平子西京賦云睚眦蠶芥五臣注怒貌李善注引張  
揖子虛賦注曰蒂芥刺鯁也蠶與蒂同郭象莊子注  
亦云蠶芥

負茲曲禮云有負薪之憂孟子云有采薪之憂義皆  
相近周益公謝嗣來曰介竹無功貍辭狼邵負茲有  
疾願備祠官人謂誤寫不知公自注云出公羊威公  
十六年屬負茲注云屬托也諸侯疾稱負茲大夫稱  
犬馬士稱負薪此言托疾也

獻成發成斯于考室注考成也歌詩以落之又左傳  
欲與諸侯樂之饗大夫以落之然落有隕墜衰謝之  
義今人用落成非宜檀弓晉獻文子成室諸大夫焉  
注獻之謂賀也諸大夫亦發禮以往獻之與發二字  
爲美一散李經載酒器如曰單尊爵觶角觥觚至後  
世有伯雅叔雅季雅大曰婪尾觴號人皆知之詩簡  
兮公言錫爵註惠下不過一散散酒爵也受五升此  
二字亦奇

絲竹管絃舊傳王羲之蘭亭修禊引用絲竹管絃字  
故不入文選殊不知西漢張禹傳嘗用是四字矣羲  
之用祖此而劉原父注亦云絲竹管絃物二等爾於  
文爲駢

芥隱筆記序

士非博學之難能審思明辨之爲難古人固有耽玩  
典籍涉獵書記窮年皓首貪多務得者矣然履常蹈  
故誦書綴文趣了目前不求甚解疑誤相傳莫通倫  
類漫無所考按也 檢討龔公以學問文章知名當  
世諸公要人爭欲令出其門下自六藝百家諸史之  
籍無所不讀河圖洛書山鑿冢刻方言地志浮屠老  
子騷人墨客之類無所不記至於討論典故訂正事  
實辨明音訓評論文體雖片言隻字必欲推原是正



俾學者知所依據此其閒居暇日有得於一時之誦  
覽者隨而錄之號曰筆記若夫他日當大典冊渙大  
號令則武夫感泣癯老扶觀當埒燕許輩秉太史筆  
褒貶是非勸善懲惡凜然有遺直之風回視筆記特  
翰墨之遊戲耳嘉泰改元監冬旣望汶人劉董敬用  
鋟木于東寧郡庠庶侈其傳

芥隱筆記

宋 檢討龔公

八十一萬歲

李太白詩云拜龍顏獻聖壽北斗吳南山摧天子九  
九八十一萬歲歲歲長傾萬壽杯余嘗爲聖節詩用  
八十一萬歲事或問有所據否因舉此且云道藏雲  
笈七籤二帙混元聖紀云混元一始萬劫至于百成  
百成亦八十一萬年而有太初太初之時老君從虛  
空而下爲太初之師又自太上生後復八十一萬億

八十一萬歲乃生一炁

禍雙

荆公金陵懷古詩逸樂安知與禍雙雙字最佳史龜  
筭傳禍與福同刑與德雙聖人察之以知吉

擲火萬里流鈴八衝 四日

杜牧之詩老翁四百牙爪利擲火萬里精神高蓋用  
天蓬呪蒼舌綠齒四目老翁而今本誤以目為百爾  
擲火萬里亦用度人經擲火萬里流鈴八衝之語而  
東坡亦用之於芙蓉城詩云仙風鏘然韻流鈴也

東坡宸奎閣碑銘

東坡宸奎閣碑銘巍巍仁皇體合自然神曜得道非  
有師傳蓋出八師經吾今自然神曜得道非有師也

蜂蠆

又蜂蠆發於懷袖出晉書鄒湛對晉文帝曰猛虎在  
山荷戈而出凡人能之蜂蠆發於懷袖勇夫為之驚  
駭出於意外也 蜂蠆二字東坡屢用之

殺之三宥之三

東坡試刑賞忠厚之至論其間有云臯陶曰殺之三

堯曰宥之三梅聖俞以問蘇出何書答曰想當然耳  
此語蘇蓋宗曹孟德問孔北海武王伐紂以妲已賜  
周公出何典答曰以今準古想當然耳一時猝應亦  
有据依

### 退之用字

退之孔幾

音達

誌銘云孔世三十八吾見其孫白而長

身據說文廿而集反二十并也声速達反三十并也

册先立反四十并也退之自謂識字故用之爲四字

銘今刊正書者改作二十八非是

案玉篇廿字如拾切二十并也声字

先闔切三十也册先入切四十也廣韻  
二十七合声字音殿二十入盡又收

### 騰驤字

老杜瘦馬行此豈有意仍騰驤蓋用史記騶衍此豈

有意阿世苟合而已哉意最爲奇

### 黃石白猿

杜牧之詩授圖黃石老學劔白猿翁蓋出庾信字文  
盛墓誌云授圖黃石不無師表之心學劔白猿遂得  
風雲之志

### 折綿冰酒

山谷詩霜威能折綿風力欲冰酒蓋用阮籍詩陽和  
微弱陰氣竭海凍不流綿絮折呼吸不通寒冽冽度  
肩吾詩勁氣方凝海清威正折綿張說塞上綿應折  
江南草可結語也

退之詩

歡華不滿眼咎責塞兩儀蓋用前漢叙傳福不盈皆  
禍溢於世

東坡泗州塔詩

耕田欲雨刈欲晴去得順風來者怨蓋用劉夢得同  
施于陸其時在澤伊種之喜乃種之厄同舟于江其  
時在風浴者之吉泝者之凶

杜子美詩

東坡謂老杜竊比稷與尚蓋求之於其詩舜舉十六  
相身尊道何高秦時用商鞅法令如牛毛意特有所  
指余以爲見此老容民畜衆之度莫若水深魚極樂  
林茂鳥知歸又林茂鳥攸歸水深魚知聚重言之此  
其意有在

滕王閣記

王勃滕王閣記落霞與孤鶩齊飛秋水共長天一色  
蓋宗度子山華林馬射賦落花與芝蓋齊飛楊柳共  
春旗一色

退之用丞輔字

田氏先廟碑銘訖其外庸可作丞輔乃用呂氏春秋  
晉文公出已反國介子推不肯受賞爲賦詩曰有龍  
于飛周徧天下五蛇從之爲之丞輔龍返其鄉得其  
處所四蛇從之得其露雨一蛇羞之稿死中野而刊  
正者以丞爲承其未知此歟

陳琳書

魏陳琳與曹洪書云縈帶爲垣高不可登折箸爲械  
堅不可入蓋宗畫地爲獄議不入刻木爲吏期不對  
山谷用巴西字

山谷詩豎羹不如放麇樂羊終媿巴西按說苑樂羊  
爲魏將以攻中山其子在中山中山懸其子示樂羊  
樂羊不爲奪志攻之愈急中山因烹子而遺之樂羊  
食之盡一杯中山見其誠也不忍與其戰果下之遂  
爲魏文侯開地文侯賞其功而疑其心孟孫獵得麇

使秦西巴持歸其母隨而鳴秦西巴不忍縱而與之  
孟孫怒而逐秦西巴居一年召以為太子傅左右曰  
夫秦西巴有罪於君今以為太子傅何也孟孫曰夫  
以一麀而不忍又將能忍吾子乎山谷謂巴西可乎

退之越裳操辨田字

越裳操孰荒于門孰治于田四海既均越裳是臣詩  
定之方中靈雨既零命彼倌人星言夙駕說音于桑  
田頌師古急就章注古者田陳聲相近漢童謠邪徑  
賊良田讒口害善人桂樹華不實黃雀巢其顛易林

噬嗑之未濟曰邪徑賊田政惡傷民節之井曰宣髮  
龍身為王主田

閔已賦辨寬字

退之閔已賦獨閔閔其曷已兮憑文章以自宣昔顏  
氏之庶幾一隱約而平寬固哲人之細事兮夫子  
乃嗟歎其賢詩考槃考槃在澗碩人之寬獨寐寤言  
永矢弗諼寬音區權切裕也  
寬也諼光元切

淮西碑辨謀字

莫胡切

帝為不聞與神為謀易林比之家人曰懿公淺愚不

深受謀夫之乾曰狼戾靡謀無言不殊節之比曰張  
陳嘉謀贊成復都又淮蔡為亂天子伐之詩死生契  
闊與子成說執子之手與子偕老于嗟闊兮不我活  
兮太玄斷首欲決不決爾仇不闕乃後有鉞成公綏  
天地賦斷鼈足而續毀鍊五色而補缺豈斯事之有  
徵將言者之虛設何陰陽之難測偉二儀之參闕

辨古人用牙字

毗胡切

毛穎傳今日之獲不角不牙衣褐之徒詩祈父予王  
之爪牙胡轉予于恤靡所止居易林訟之鼎曰虎聚

磨牙以待純豬太玄首夷其牙或飫之徒豨毅其牙  
發以張弧急就章款冬貝母薑狼牙亭歷桔梗龜骨  
枯楊雄豫州箴陪臣執命不慮不圖王室陵遲喪其

爪牙牙

毗胡切  
齒也

古人用山字

所彌切

退之謝自然詩童駿無所識但聞有神仙輕生學其  
術乃在金泉山詩斯于秩秩斯于幽幽南山古詩藁  
砧今何在山上復有山何當大刀頭被鏡飛上天楚  
詞招魂高堂邃宇檻層軒層臺累榭臨高山網戶珠

綴刻方連楊雄解嘲蘭先生收功於章臺四皓采榮  
於南山公孫創業於金馬蹕騎發迹於祁連史記龜  
筭傳河雖神賢不如崑崙之山漢書衛霍叙傳飲馬  
翰海封狼居山西規大河列郡祁連山所旃切說文  
山宜也祈連山名謂置郡至此

辨口字

孔五切

元和聖德詩疆外之險莫過蜀上韋臯去鎮劉闢守  
後血人于牙不肯吐口詩正月不自我先不自我後  
好言自口莠言自口憂心愈愈是以有侮正考父

昭七

年鼎銘一命而僂再命而偃三命而俯循牆而走亦  
莫余敢侮饘於是鬻於是以餬余口漢溝洫志白渠  
之歌田於何所池陽谷口鄭國在前白渠起後舉重  
爲雲決渠爲雨涇水一石其泥數斗日漑月糞長我  
禾黍衣食京師億萬之口上林賦出乎椒丘之闕行  
乎州淤之浦徑乎桂林之中過乎泱莽之壑汨乎混  
流順阿而下赴隘陜之口西京賦鄙生生乎三百之  
外傳聞於未聞之口曾髣髴其若夢未一隅之能觀

辨厚字

狠口切





辨寫字音 賞羽切

未乃取關駭汗如寫揮刀紛紜爭切膽臚詩蓼蕭零  
露滑兮我心寫兮是以有譽處兮寫 賞羽切 諺云書三  
寫魚成魯帝成虎

辨閒字音 居賢切

退之詩孟東野失子詩彼於女何有乃令蕃且延此  
獨何罪辜生死旬日間詩還十畝之間兮桑者閑閑  
兮行與子還兮漢李廣傳自以大黃射其禪將服注  
曰黃肩弩也晉灼曰黃肩即黃閒也上林賦赤瑕駸

舛雜甫其間昌采琬琰和氏出焉班固西都賦裒以  
繅繡絡以編連 一作綸 隨侯明月錯落其間曹植瑟瑟歌  
東西經七陌南北越九阡卒遇回風起吹我入雲間

辨渴字音 巨列切

送文暢師下開迷惑曾庠 音豁呼括切 斲株糜 音屈 僧時  
不聽瑩若飲水救渴列子黃帝之所聽瑩也詩君子  
于役日之夕矣牛羊下括君子于役苟無飢渴易林  
豫之賁曰泉閉澤竭黃庭經時念太倉不飢渴役使

六丁神女謁渴 巨列切 括 古活切

辨乖字音公回切

猛虎行自矜無當對氣性縱以乖朝怒殺其子暮還  
食其妃六月蓼蕭廢則恩澤乖矣湛露廢則萬國離  
矣漢蘇武詩胡馬失其羣思心常依依何況雙飛龍  
羽翼臨當乖漢律曆叙傳官失學微六家分乖一彼  
一此庶研其幾崔駰達旨淳朴散離人物錯乖高辛  
攸降厥趣各違王逸九思紛載矩兮高馳將咨詢兮  
皇義道何臯兮周流路變易兮時乖乖暱切

辨稼字音古護切

送李愿歸盤谷序盤之中維子之宮盤之上維子之  
稼詩七月九月築場圃十月納禾稼易林豐之未濟  
曰沽洽時澍生我禾稼小過之大畜曰雨溢過度傷

害禾稼圃音溥故稼古護切

辨角字音盧谷切

贈唐衢虎有爪兮牛有角虎可博兮牛可觸詩麟之  
趾麟之角振振公族漢律曆志角觸也物觸地而出  
戴芒角也又曰角於斛切東方朔傳曰臣以為龍又無  
角謂之為蛇又有足仲長統騰蛇弃鱗神龍喪角至

人能變達士拔俗郭璞共工贊共工赫怒不用是觸

地虧異維天缺乾角角盧谷切見資暇集

辨蛇字音唐河切

東方朔詩方朔聞不喜褫身絡蛟蛇膽相北斗柄兩

手自相接詩羔羊素絲五蛇委蛇委蛇易林曰長尾

委蛇畫地成河楊雄反離騷既亡鸞車之幽藹兮駕

八龍之委蛇臨江瀕而掩涕兮何有九招與九歌張

衡西京賦感河馮懷湘娥驚蜩蝻皆水神憚蛟蛇郭璞

流沙贊經帶西極頽塘委蛇注于里水永溺餘波

辨降字音乎政切

劉統軍碑琳後來降公不有功詩草蟲憂心忡忡我

心則降孟子曰洚水者洪水也楚辭四用降款徐邈

皆乎汝切楊雄河東賦雲靈靈而來迎兮澤滲漚而下降

鬱蕭條其幽藹兮滄烏孔切汎沛以豐隆馬融笛賦無

相奪倫以宣八風律呂既和哀聲五降阮籍寄懷詩

陽精蔽不見陰光代為雄亭亭在須臾厭厭將復降

辨售字音

送劉師服詩齋財入市賣貴者常難售豈不久憔悴

為功忌中休詩谷風賈用不售樂府壠頭水歌將頓  
樓蘭鄰就解月支裘勿令如李牧功多信不售時周切  
賣物出手也

正餐字音

須倫切

餐

音素餐  
千安切

祭嫂鄭夫人文念寒而衣念飢而餐

音孫

疾疹水火無

災及身詩伐檀彼君子今不素餐今宋玉九辨竊慕  
詩人之遺風願託乎素餐蹇充諱而無端今汨莽莽  
而無垠易林謙之次曰懸鶉素餐餐非其任失亡遠  
民實勞我心餐舖也

哀字音

於希切

祭周氏姪女文今當長歸與一世違凡汝親戚孰能  
不哀詩采薇我心傷悲莫知我哀說文從口衣聲爾  
雅哀哀懷報德也裴瑜音衣國語各娶其所有以待  
所歸兮猗兮違兮心之哀兮宋玉九辨覲杪秋之遙  
夜兮心僚悵而有哀春秋連連而日高兮然惆悵而  
自悲劉向九歎欲遷志而改操兮心怫結而未離外  
仿惶而遊覽兮內惻隱以含哀張衡南都賦布綠葉  
之萋萋敷華藻之蓑蓑玄雲合而重陰谷風起而增

哀

壹似字

退之聖德詩壹似堯禹壹似蓋用禮記夫子之言

檀弓

孔子過泰山側有婦人哭於墓者而哀夫子使子路問之曰子之哭也壹似重有憂者

用泐字

荆公常夷甫誌文石可泐也用考工記石有時以泐鄭司農注讀為再拗而後掛之拗謂石解散也

荆公押而字

荆公在歐公坐分韻送裴如晦知吳江以黯然消魂

唯別而已分韻時客與公八人荆公子美聖俞平甫

老蘇姚子張焦伯強也時老蘇得而字押談詩究乎

而荆公乃又作而字二詩采鯨抗波濤風作鱗之而

蓋用周禮考工記旄人深其爪出其目作其鱗之而

注之而煩頷也

又云春風垂虹亭一杯湖上持傲兀何賓客

兩忘我與而最為工君子不欲多上人王蘇之憾未

必不稔於此也

正老杜自平詩

杜詩自平宮中呂太一按唐史有兩呂宦官呂太一

為廣南市舶使反故下云收兵南海千餘日復何疑  
而說詩者紛紛不可曉至謂唐有自平宮開元中中  
書舍人呂太一與張嘉正號四優者又呂寧為太一  
宮使尤謬

作詩下字來歷

史記秦虎狼之國也唐史太宗龍鳳之姿而子美昭  
陵詩云識歸龍鳳質威定虎狼都各易一字最為妙  
處洪氏辨證謂急急能鳴鴈輕輕不下鷗能鳴用莊  
子不下用列子語於此見其用出處下字之法

杜詩古今本不同

王仲言自宣城歸得杜甫詩三帙有南唐澄心堂紙  
有建鄴文房印沈思遠印及勅賜印筆法精妙殆能  
書者試考一二詩多與今本不同如憶李白詩白也  
詩無數飄然意不羣清新庾開府豪邁鮑參軍渭北  
春天樹江東日暮雲何時一樽酒重與話斯文九日  
詩乃云今朝醉裏為君歡笑倩傍人為正冠又再把  
茱萸子細看又芹泥隨燕觜藥粉上蜂鬚宮草霏霏  
隨委佩雲近蓬萊常五色酒醒思汗筆已近苦寒夜

長貧怪婦愁雨映行宮辱贈詩騎馬誰家白面郎不  
通姓字麤疎甚忍待江山麗之類不可槩舉也

荆公用麥氣字

荆公晴日晚風生麥氣麥氣蓋用何遜新林分別詩  
麥氣始清和

老杜秦城字

三輔黃圖長安故城城南爲南斗形城北爲北斗形  
故號斗城何遜咸陽詩云城斗疑連漢老杜秦城近  
斗杓秦城北斗邊北斗故臨秦而秦中詩春城依北  
斗郢樹發南枝乃秦城耳劉夢得望賦亦云城依斗  
兮蘭干春亦無義亦不可對郢樹也

樂天詩

醉翁迂叟東坡之名皆出於白樂天詩云

荆公用歸字

荆公詩綠攪寒蕪出紅爭暖樹歸妙甚歸字蓋用老  
杜紅入桃花嫩青歸柳葉新李白寒雪梅中盡青風  
柳上歸意

老杜用受字進字逗字



老杜受字進字逗字最用工夫吹面受和風修竹不  
受暑飛燕受風斜野航恰受雨三人樹濕風涼進山  
谷進風涼殘生逗江漢遠逗錦江波陰鏗詩有行舟  
逗遠樹

作詩祖述有自

謝靈運有雲中辨煙樹天際識歸舟王僧孺有岸際  
樹難辨雲中鳥易識梁元帝有遠村雲裏出遙船天  
際歸陰鏗詩有天際晚帆孤天邊看遠樹人江靜猶  
浪老杜所以有江流靜猶湧雲中辨煙樹鑑詩有薄  
雲巖際出初月波中上杜詩薄雲巖際宿孤川浪中  
翻鏗有中川聞棹謳杜有中流聞棹謳鏗有花逐下  
山風杜有雲逐度溪風祖述有自青出於藍也

作詩得意句

陳去非嘗語先君云吾平生得意十字云開門知有  
雨老樹半身濕先君故効之作感興詩云夜半微雨  
濕凌晨春草長謂願正云吾十字似有味後讀河嶽  
英靈集間訪詩荒庭人何許老樹半空腹殷璠謂皎  
然可佳殆亦有所祖云

唐朝酒價

丁晉公對真廟唐酒價以三百亦出於一時耳若李  
白金樽清酒斗十千白樂天共把十千酷一斗又軟  
美仇家酒十千方得斗又十千一斗猶餘飲何況官  
供不著錢又崔輔國與酷一斗酒恰用十千錢

八十為八秩

禮年八十日有秩故以八十為八秩又道家流用此  
語白樂天屢用之自注行開第八秩可謂盡天年時俗  
謂七十以上又云已開第七秩屈指幾多人  
為開第八秩

蒲桃瓜聲

琵琶瓜聲

調笑瓜聲

司馬瓜聲

樂天詩羌管吹楊柳燕姬酌蒲桃

蒲桃太原酒名

銀合鑿落

蓋金屑琵琶槽秦再思記異錄温州朱史君有一妓

善胡琴忽亡念之追悼詩云冤飛寥

今上諱

鬼歸煙只

住人間十八年昨日施僧裙帶上斷腸猶繫琵琶絃

琵琶亦從瓜聲

晉書阮咸傳唐元行沖傳琵琶字並無音唐書音訓外咸傳調笑音調

打嫌調笑易飲訝卷波遲

調笑拋拍曲名卷白波酒令

燭淚連盤

壘蒲桃又對東溪野枇杷上林賦枇杷蒲桃皆無音

四十著緋軍司馬男兒官職未蹉跎一為州司馬二

見歲重陽武元衡亦有唯有白鬚張司馬不言名利尚相從

樂天川淵明詩

淵明詩弱女雖非男慰情良勝無故樂天云衰病四十身嬌癡三歲女非男猶勝無慰情時一撫

東坡德星句

東坡詩斯人乃德星遣出虛危間用樂天德星降人福時雨助歲功福似歲星移望如時雨至意

東坡用樂天詩

樂天詩去歲暮春上巳共泛洛水中流今歲暮春上

巳獨立香山下頭東坡用之爲海外上元詩

東坡惠州上元

夜詩前年侍玉輦端門萬枝燈云云今年江海上雲房寄山僧

樂天與子美詩一意

老社安得廣廈千萬間大庇天下寒士俱歡顏嗚呼何時眼前突兀見此屋吾廬獨破受凍死亦足樂天百姓多寒誰可捄一身雖煖亦何情安得大裘長萬丈一時都蓋洛陽城

李商隱詩

商隱有點窳堯典舜典字塗改清廟生民詩樂大有  
毛詩三百篇後得文選六十卷中無

詩中用愛閑字

多病愛閑始見南史王儉傳樂天有經忙始愛閑劉  
夢得有功成却愛閑杜牧之有愛閑能有幾人來

老杜樂天詩語

詩中用而今匹如此些耳冷妬他欺我生以勿畱羸  
垂溫暾皆樂天語相仄欺有底也自也知差底斬新  
遮莫皆老杜詩

太史公司馬相如贊

太史公作司馬相如贊曰春秋推見至隱易本隱之  
以顯大雅言王公大人德逮黎庶小雅譏小已之得  
失其流及上所以言雖外殊其合德一也而自序曰  
易著天地陰陽四時五行故長於變禮經紀人倫故  
長於行書記先王之事故長於政詩記山川谿谷禽  
獸草木牝牡雌雄故長於風樂樂所以立故長於和  
春秋辨是非故長於治人

魚千里

山谷用魚千里事蓋出關尹子以盆為沼以石為塢

魚環游之不知其幾千萬里也山谷屢用魚千里字尋師訪道魚千里蓋

世功名黍二炊又小池已築魚千里隙地仍栽莘百區又爭名朝市魚千里觀道詩書豹一班

北征詩

北征詩皇帝二載秋閏八月初吉盧仝月蝕詩元和

庚寅斗柄插子律調黃鍾白樂天賀雨詩皇帝嗣寶

曆元和三年冬又苦寒詩八年十二月五日雪紛紛

韓詩元和庚寅斗插子

柳耆卿詞語

陰鏗有夜雨滴空堦柳耆卿用之人但知為柳詞耳

樂天長恨歌

樂天有玉容寂寞淚蘭干梨花一枝春帶雨不知又

有薔薇詩露垂紅萼淚蘭干

牧之助勦字

牧之詩塵土驚助勦樂天委命不助勦

詩用鬪在字

詩中用鬪在蓋出樂天詩世上爭先從盡上聲汝人間

鬪在不如吾樂天用格是字

轉席

今新婦轉席唐人巴爾樂天春深娶婦家詩云青衣

轉去聲氍毹錦繡一條斜

蘇小小

樂天詩揚州蘇小小人道是天斜音伊邪反

鄭重字

前漢王莽傳皇天所以鄭重降符命之意師古言頻煩也又三國志夷狄國家哀汝故鄭重賜汝好物樂天謝度順之送紫霞綺云千里故人心鄭重一端香

綺紫氤氳又交情鄭重金相似

季布毀譽

史記季布言陛下以一人譽召臣以一人毀去臣乃祖韓非子魯丹曰夫以一言善我必以一言罪我

落吾手

老杜不意青草湖扁舟落吾手樂天天與愛水人終焉落吾手

杜詩用前人意

老杜寒日出霧遲清江轉山急亦用陰鏗野日燒中

昏山路入江窮意

席壽

唐書百官志席壽謂器用經久謂之壽考工記犀甲

壽百年起於此

唐志惟帑則題歲月席壽三年龜壽五年禡壽七年考工記犀甲壽百年

兕甲壽二百年合甲壽三百年

裝潢兩字

裝潢

音黃又音晃

染黃紙修治之名本齊民要術

按唐百官

志校書郎掌校理典籍注云有學生三十八人令史二人楷書十二人熟紙裝潢匠八人

鉗勒

唐后妃傳舉能鉗勒鉗字蓋本漢梁異妻性鉗忌

鉗

也言性忌害如鉗之鉗物也女輒反

善禁架

即禁術也如費長房之術唐書后妃列傳上第二

善禁架用後漢徐登傳語

徐登傳云但行禁架所療皆除

唾手

高祖隱太子建成傳云云利兵塵之唾手可決用九

州春秋唾掌語

盜亦有道

唐王竇傳贊盜亦有道用莊子記盜跖之言

左方

左方謂簡冊之左唐書亦有此語

桑蔭不徙

唐書屈突通尉遲敬德等傳贊桑蔭不徙而大功立

劉子云堯之知舜不違桑蔭

劉子知人篇堯之知舜不違桑蔭文王之知呂

望不以永昌

諸史語

二李傳賢長城用漢賢於兵十萬騎五千之文

房杜傳忠於所事用魏志注

登殺用唐律即時為

登即時殺之也

律登時殺傷者勿論

曲折出李廣傳

報天子失軍曲折猶委曲也

楊國忠傳以計勝色者昌荀悅之語

餌藥

唐傳張臯疏人無故不應餌藥出千金方序論云病

患已成須勤藥餌故立補養之方平人無事不宜著

手

經史雜語

回鶻傳不一而足用公羊傳

文九年又襄二十九年

許夷狄者

不一而足也



蘭亭敘云後之視今亦猶今之視昔用京房傳語房曰臣恐後之視今猶今之視前也

唐儒學傳禪其家用東漢敘贊世禪雕籠語

板師用左氏扞板事文藝傳義形於色用左氏孔文子語

唐書乾沒于沒乾匿皆同義

賈捐之語

後漢南匈奴傳語曰父戰於前子死於後弱女乘於亭障孤兒號於道路老母寡妻設虛祭飲泣淚想望

歸魂於沙漠之表全用西漢賈捐之語

鷲鳥累百不如一鶚

史記趙簡子曰鷲鳥累百不如一鶚鄒陽上書亦用之孔文舉薦禰衡表又用此語孫權曰云云令蒙討賊誅其首惡

曹植用墨子語

墨子雖有賢君不愛無功之臣雖有慈父不愛無益之子故曹植自試表云故慈父不能愛無益之子仁君不能畜無用之臣

羊祜宗管子語

羊祜讓開府表云德未爲人所服而受高爵則使才  
臣不進功未爲人所歸而荷厚祿則使勞臣不勸用  
管子德業未明於朝而處尊位者則良臣不進有功  
未見於國而有重祿者則勞臣不勸

倒行逆施

史記伍子胥傳吾日暮途遠吾故倒行而逆施之主  
父偃曰吾日暮故倒行逆施之

歐陽建

文選歐陽堅石臨終詩天網布宏網投足不獲安劉  
夢得所以有天網雖寬投足誰厝

淵明詩

王仲宣悟彼泉下人喟然傷心肝淵明所以有感彼  
栢下人安得不爲歡

子美詩有祖述

杜審言縮霧青條弱牽風紫蔓長又云寄語洛城風  
月主明年春色倍還人子美有林花著雨燕脂潤水  
荇牽風翠帶長又傳語風光共流轉蹙時相賞莫相

才隱全詩  
違皆祖述其意

古人作文皆有依倣

司馬長卿大人賦全用屈平遠遊中語 退之送窮

文學逐貧賦 老杜杜鵑詩模寫鮑照 荆公作虎

圖行全倣老杜 老杜用元自見來東坡所以用之

意匠

意匠慘澹經營中用陸機文賦意司契而為匠 老杜丹書

引詔謂將軍拂絹素意匠慘澹經營中

老杜倣淮南子語

淮南子水清則魚聚木茂而鳥樂所以老杜有林茂

鳥攸歸水深魚知聚

古人用字

王維詩九天閶闔開宮殿萬國衣冠拜冕旒 雜詩 老杜

閶闔開黃道衣冠拜紫宸 淵明日月不肯遲 雜詩 晨

雞不肯鳴 飲酒詩 老杜有秋夫不肯明江平不肯流兵

戈不肯休王室不肯微

太湖

上林賦東注太湖郭璞注曰太湖在吳縣尚書所謂

震澤也

窳窳 封豨 鑿齒

淮南子應劭注堯之時窳音窳窳音窳封豨鑿齒皆為人

害鑿齒齒長五尺似鑿故長楊賦秦封豕其上窳窳

其民鑿齒之徒相與摩牙而爭之

徐凝用界字

天台山賦瀑布飛流而界道所以徐凝有界破青山

色孰謂其惡而無所自耶賦云赤城霞起以建標云云

崔駟宗楊雄

崔駟達旨譬猶衡陽之林岱陰之麓伐尋抱不為之

稀執拱把不為之數蓋宗楊雄解嘲譬江湖之崖勃

解之島乘鴈集不為之多雙鳧飛不為之少

社日停針線

周美成社日停針線蓋用張文昌吳楚詞今朝社日

停針線有自來矣

真厲字

退之與崔十六詩前計頓乖張居然見真厲厲字字

昔云偽物也蓋出韓非子齊伐魯索饒鼎魯以其厲

往齊曰鴈魯曰真也古止用鴈字宋景文有真麇不同物治亂不同目又麇賈亂屢窳農亂田東坡亦用之茯苓詩山谷亦用之

抑鮓

宋景文詩蟹美持螯日魚香抑鮓天用楊淵五湖賦連鮓抑鮓

雨絕

太白詩雨絕無還雲用三國志吳虞翻傳罪弃雨絕陳孔璋檄又曰雨絕於天

東坡用韓非子語

韓非子國平則養儒俠難至則用介士所養非所用所用非所養東坡六國論用此語

鄂鄂

史記趙世家趙簡子有臣曰周舍好直諫舍死簡子每聽朝不悅大夫詩臯簡子曰大夫無臯吾聞千羊之皮不如一狐之腋諸大夫朝徒聞唯唯不聞周舍之鄂鄂是以亡也又商君傳商君曰我治秦孰與五殺大夫賢趙良曰千羊之皮不如一狐之腋千人之

諾諾不如一士之鄂鄂必出於此

左氏與史遷

左氏晉重耳謂季隗曰待我二十五年不來而後嫁  
對曰我二十五矣又如是而嫁則將就木焉史記晉  
世家重耳謂其妻曰待我二十五年不來乃嫁其妻  
笑曰犁二十五年吾冢上栢大矣雖然妾待子

天啓之矣

左氏

閔元年

畢萬以是始賞天啓之矣史記晉世家以

是始賞天開之矣

不當如此

史記張釋之傳云吏不當如此耶薛廣德傳云曉人  
不當如是耶魏志傳曰事不當爾耶皆有味也

豚犢

曹子丹佳人生汝兄弟犢耳

魏書注

劉景升兒子若豚

犬耳

孫權傳

生子當如李亞子吾兒豚犬耳

五代史

首鼠

史記灌夫傳與長孺共一老秃翁何爲首鼠兩端後

漢鄧訓傳首施兩端

注猶首鼠也

西羌傳亦云首施兩端

破碎大道

前漢夏侯勝傳章句小儒破碎大道後漢楊終傳章句之徒破壞大體

下云宜如石渠故事求為後世則

綠沉綠檀

老杜有苔卧綠沉槍南史有綠沉屏風杜牧之有腔歷綠檀槍檀與沉宜相近

反水不收

光武紀反水不收何進傳覆水不收太白詩雨落不上天水覆難再收

千石魚

前漢貨殖傳水居千石魚波

波讀為波

言養魚一歲收千

石唐皮日休釣侶詩一斗霜鱗換濁醪注云吳中賣

魚論斗酒乃論斤

巴寡婦清傳水居千石魚波山居千章之菾菾即菾樹也

王岐公宗樂天詩

王岐公元豐中餞文潞公歸洛詩有精神如破貝州時蓋用樂天上裴晉公詩聞說風情筋力健只如初

破蔡州時語

矢來無鄉

山谷作蘇李枯木道士賦有懼夫子之獨立矢來無  
鄉出韓非子矢來有鄉鄉方也有來從之方則積鐵  
以備一鄉謂聚鐵一身以備一處則甲之不全者矢  
來無鄉則鐵室以盡備之謂甲之全者自首至足無  
不有鐵故曰鐵室備之則體不傷破

富貴他人合

富貴他人合貧賤親戚離文選曹顏遠詩又見晉書  
殷浩傳蓋用慎子家富則疎族聚家貧則兄弟離語

森如束

文選張昇陽雜詩叢林森如束唐元稹連昌宮中滿

宮竹歲久無人森似束蓋用此

東坡過李公擇故居  
詩四鄰戒莫犯十畝

森似束

來茲

文選古詩何能待來茲用呂氏春秋今茲美禾來茲  
美麥注茲年也

思君令人老

文選古詩有思君令人老曹子建有沉憂令人老其  
本出唯憂用老耳

文選古詩思君令人老歲月忽已晚



東坡西江月

有惠州作時侍兒朝雲  
新亡其寓意為朝雲作

東坡梅詞不與梨花同夢蓋用王建夢中梨花雲詩

王昌齡梅花詩落落實實路不  
分夢中喚作梨花雲坡用此語

東坡真蹟

東坡四時詞冬詞云真態生香誰畫得玉奴纖手嗅  
梅花真蹟乃云王如墨莊謂意方全子兄孫昌符家  
坡朱陳詞真蹟云半依古柳賣黃瓜今印本多作牛  
依或遷就為牛衣矣

往古來今

慕容雋傳  
內李產傳

鷓冠子栢枋一術奚足以游往古來今事郭為郵晉  
載記慕容雋曰不可復以西夕之年取笑來今  
笑啼俱不敢

玉臺新詠詠樂昌云笑啼俱不敢李商隱亦云又云  
啼笑兩難分

飢鷹待一呼

老杜有飢鷹待一呼白樂天呼鷹正反飢温庭筠飢  
鷹不待呼吳融飢鷹只待呼

金斗熨波

白樂天金斗熨波刀剪紋陸龜蒙波平熨不如又天  
如重熨皺温庭筠綠波如熨豁愁腸王君玉金斗熨  
沉香又金斗熨秋江

劉夢得東坡用字法

劉夢得稱韓文云鸞鳳一鳴蜩蟬革音東坡有振鬣  
長鳴万馬皆瘖

五柞三楊

柞音作

荆公次韻酬龔深甫詩云北尋五柞固未慙東挽三  
楊仍有樛輿地志鍾山本少林木宋時使諸州刺史

罷職還者栽松三千株下至郡守各有差焉山之最  
高峰有五願樹樹柞木也元嘉中百姓祈禱率有驗  
又李太白白下亭詩驛亭三樹楊正當白下門王詩  
三楊白下亭

荆公用事

河南志盧元明侯山記曰漢有王玄者隱於此山景  
帝再徵不屈就其山封侯因以為名唐宋之間侯山  
詩云王玄拜隱侯荆公草堂懷古周顒宅作阿蘭若  
婁約身歸宰堵波他日隱侯身亦老為尋陳迹到煙

蘿世多謂沈約耳不知乃用此王氏事

理絲竹筦弦

漢張禹傳後堂理絲竹筦絃故右軍用之蘭亭敘而

或者謂昭明所不取其未知班孟堅之詞耶

文選不載蘭亭

涪翁

後漢郭玉傳有老父不知所出嘗漁釣於涪水因號涪翁山谷亦以此為號

益部耆舊傳廣陵有老翁釣於涪水自號涪翁後漢

郭玉傳亦然山谷責涪州因此為號

退之徐偃王銘

退之徐偃王廟碑銘秦桀以顛徐由邈綿蓋用楊雄

廷尉箴嚴以刑顛秦以酷敗之語而意義尤遠

退之聯句

退之石鼎聯句豕腹脹彭亨乃用詩蕩包然于中國

注包然彭亨也

退之詩又澁旋皮養鬱苦開腹膨臍

不子也

唐書后妃列傳

玄宗貞順皇后武氏初妃專寵封所生母楊鄭國夫

人弟忠國子酒信秘書監將遂立皇后御史潘好

禮上疏曰禮父母讎不共天春秋子不復讎不子也

陛下欲以武氏為后何以見天下士妃再從叔三思

也從父延秀也皆于紀亂常天下共疾夫惡木垂蔭  
志士不息盜泉飛溢廉夫不飲匹夫匹婦况天子乎  
願慎擇萃族稱神祇之心薨年四十餘贈皇后

民獻竭來分教玉融荒陋絕少書籍間有闕疑無  
復訂正一日使君袖出此書相與誦詠片言隻字  
音辨義明迺知公之該博尤探探討宜闡之以不  
艾後學公之學問殆不止是俾來者窺一斑云苕  
溪雍民獻敬書

宜齋野乘

宋 吳枋

五帝非官天下



說苑載鮑白令之對始皇曰天下官則讓賢家則世  
繼故曰五帝以天下為官三王以天下為家今觀帝  
王世紀云黃帝次妃女節生少昊則少昊乃黃帝子  
也是傳位與子自黃帝始而非起於夏禹家語五帝  
德及書序注史顓帝紀并通曆皆云顓帝為昌意子  
則亦黃帝孫也是少昊傳位於姪史記家語皆云帝

嚳祖元囂父嶠極又高辛紀注書序注與帝王世紀載嚳爲黃帝曾孫則顓帝傳位與從姪大戴禮并史記云帝嚳下妃生摯則高辛又傳位於子高辛次妃慶帝生堯則摯又傳位與弟史記并舜典疏以舜爲黃帝八代孫則堯傳位與五世姪孫前漢律曆志載顓帝五世生鯀則舜傳位與六世祖之從兄弟如是則五帝亦可謂之家天下今遡五帝之上而觀之禮記注云女媧承伏羲而淮南子覽冥訓注古天子姓風則亦伏羲之子孫也禮記國語皆云炎帝少典之

子而家語與史記云黃帝有熊國君少典之裔子國語又云黃帝炎帝之弟則二君同是少典之子以此而觀家天下之制其來遠矣或曰夏之十七君皆姓姒商之三十君皆姓子周之三十七君皆姓姬非如五帝之異姓曰不然五帝之時世變不同人各自爲一姓故黃帝姓公孫而少昊黃帝子也改姓已顓帝亦黃帝孫也乃姓姬堯寄於伊長孺家從母所居故姓伊耆舜生姚墟故姓姚稷契與堯同父兄弟也而稷姓姬契以簡狄吞玄鳥卵而生故姓子若以異

姓而論謂皇帝與少昊非父子而堯與稷契非同父  
之兄弟可乎 或曰家以傳子今五帝獨黃帝高辛  
傳位於子少昊顓帝皆與姪而摯則與弟蓋已非傳  
子矣堯傳之曾姪孫而舜又傳之同六世祖之從兄  
弟服紀尤爲差遠曰不然長子考監明旣以罪歿而  
放齊固嘗薦次子朱啓明矣堯未嘗不欲傳之子奈  
何朱之不肖不足以嗣位堯則擇同宗之姪孫而授  
之舜亦不敢遽然以爲君而猶避朱於南河舜亦未  
嘗不欲傳之子奈何商均之不肖不能以繼緒舜則

擇同宗之從兄弟而傳之禹亦不敢冒然以爲君猶  
避商均於陽城堯舜豈以異族而授之天下哉 且  
如商之外丙傳弟仲壬仲壬傳姪太甲太甲傳弟雍  
巳祖辛傳弟沃甲沃甲傳姪祖丁祖丁傳堂弟南庚  
南庚傳堂弟陽甲祖庚傳弟祖甲廩辛傳弟庚丁而  
周懿王傳弟孝王康王傳弟定王則商周亦有傳弟  
姪者其後如漢惠帝傳弟又帝昭帝傳姪孫宣帝成  
帝傳姪哀帝哀帝傳從弟平帝東海殤帝傳堂兄安  
帝若冲帝傳質帝則同高祖之從兄弟質帝傳桓帝

則又同五世祖之從姪比之舜禹蓋無異也 且以祭法觀之周則祖文而宗武商則祖契而宗湯夏則祖顓帝而宗禹而舜則祖顓帝而宗堯若舜爲異姓之國奚必宗堯哉蓋曰弟曰姪曰姪孫旣皆吾之族屬而謂之非家天下不可也

過秦論誤

賈誼過秦論言始皇吞二周而亾諸侯按秦昭王五十一年滅西周其後七年莊襄王滅東周四年莊襄卒始皇方卽位則吞二周乃始皇之曾祖與父非始

皇也

先輩

唐世舉人呼已第者爲先輩其自目則曰前進士按魏文帝黃初五年立太學初詣學者爲門人滿歲試通一經補弟子滿二歲試通二經者補文學掌故不通經者聽須後試故後試稱先試而得第者爲先輩由此也前進士云者亦放此猶曰早得進士而其輩行在先也此皆演繁露載通典語枋卽容齋續筆載貽子錄云同年小錄是雙隻先輩各一人分寫宴上

長少分雙隻相向而坐以東爲上觀以西爲首給舍  
員外遺補多來突宴東先輩不遷而西先輩避位又  
紹聖間王聖塗澠水燕談云蘇德詳漢相禹珪之子  
建隆四年進士第一人登第初還鄉里太守置宴以  
慶之樂作伶人致語曰昔年隨侍嘗爲宰相郎君今  
日登科又是狀元先輩又司馬溫公勸學歌云一朝  
雲路果然登姓名亞等呼先輩詳味溫公之言則登  
雲路者方呼先輩如今黃甲並呼狀元一般先輩猶  
言前名也又葛常之丹陽集云小說載優人有以李

義山服藍縷之衣而出或問曰先輩之衣何在曰爲  
館中諸學士搏將去矣人以爲笑又王直方詩話云  
蕭貫嘗夢至宮庭中賦詩有一人曰先輩異日必貴  
又春渚紀聞載棋待詔劉仲甫聞祝不疑先輩名品  
高著人傳今炆來試南省若以二家所載觀之則以  
先輩爲稱呼決非前輩之比又韋莊浣花集有癸丑  
年下第獻新先輩詩又墨客揮犀言今人於榜下擇  
婿號曰鬻婿有一新先輩少年爲貴家所慕欲以女  
妻之又彭應來有賀新先輩二十八人及第詩結句



云回頭應念差池者重待陽和振羽毛言新先輩則  
爲狀元爲前名明矣若以爲長上先生則安得加一  
新字又曰少年撫言載牛僧孺應舉時韓愈皇甫湜  
見之於青龍寺稱牛爲卽先輩又田表聖錫咸平集  
與胡旦書云秀才卽先輩乃卽日可爲先輩也其義  
甚明今人詩集中因見唐詩有先輩二字不深考其  
故皆誤作前輩近時有稱道士爲先輩尤可笑也

千字文字重複

千字文有女慕清潔又有紈扇圓潔重兩潔字今宜  
改清潔爲清貞庶不重複

孟子與孟嘗君同時

或問孟子與孟嘗君同時否曰同周顯王三十三年  
乙酉孟子見梁惠王王有利國之間慎靚王二年壬  
寅惠王薨孟子去魏適齊而齊宣之立在顯王三十  
七年乙丑其卒在赧王元年丁未孟子是年去齊赧  
王乃慎靚王之子顯王之孫方顯王四十八年庚子  
齊薛公田嬰卒其子文嗣爲薛公號曰孟嘗君能招  
致諸侯游士名重天下則田文之立在梁惠王未薨

之前而孟子適齊之時田文已立二年矣以戰國策考之馮諼西遊於梁說惠王聘孟嘗君齊王聞而謝之則與孟嘗君正同時也曰孟子既游於齊而孟嘗君之食客數千人有一亞聖之大才而不克置於賓客之列何也曰太史公謂孟嘗君招致天下任俠姦人入薛中則當時之客皆非賢士可知蓋孟嘗君非不欲招致孟子而孟子決不屑就也一魯仲連尚不爲平原君留則孟子安肯爲君之客哉其後孟嘗君廢而賓客一日皆背去此市井勢利之交毋足怪者君於此時不能自責其取士之乖謬而欲唾客之面愚矣

先子先君先人

今人稱先子先君先人爲父然不獨父也祖宗皆可如曾西稱曾參曰予先子之所畏也則稱祖爲先子子順曰吾先君之相魯也則稱六世祖爲先君孔安國曰先君孔子又曰我先人用藏其家書於屋壁則稱十一世祖爲先君稱三世祖子襄爲先人也

顏子非二十九歲歿

史記云顏子少孔子三十歲年二十九蚤歿則是魯哀公二年也按圍陳蔡時孔子年六十三而顏子當是時年三十三矣論語曰從我於陳蔡者皆不及門也德行顏淵則顏子尚無恙史記載圍陳蔡後使子貢至楚昭王將以書社地七百里封孔子令尹子西曰王之輔相有如顏回者乎由是觀之則顏子之木歿益信而有證非二十九歲明矣

### 畫野分州

黃帝時畫野分州八家爲井井一爲鄰鄰三爲朋朋三爲里里五爲邑邑十爲都都十爲師師十爲州一州是百五十三萬家

### 名不可稱

唐人多有稱人名者詩中惟甚今人學唐詩者多做之不知其不可枋記李習之答梁載言書云孟子曰天下之達尊三德爵年惡得有其一以慢其二足下之書韋君詞楊君潛足下之德與二君未知先後也足下齒幼而位卑而皆名之傳曰吾見其與先生並行也觀習之之言則當時亦以稱前輩名爲非枋

謂古者君稱臣名父兄稱子弟名師稱子弟名禮疏云名者職賤之稱仲尼於弟子外不敢稱人名曾子稱子夏之名蓋因子夏稱無罪怒而責之也嘗考桓公四年夏天王使伯糾來聘注禮君於臣而不名者五諸父兄不名詩云王曰叔父是也子大夫不名祭伯是也盛德之士不名叔肸是也老臣不名宰渠伯糾是也如桓二年及其大夫孔父十七年蔡季自陳歸莊三年紀季以鄫入于齊閔元年季子來歸僖十六年公子季友卒公羊曰何以不名賢也閔二年齊與子來盟公羊曰何以不名喜之也又白虎通曰王者臣有不名者五先王老臣不名與先王戮力共治者尊而不名尚書曰咨爾伯不言名也不名者貴賢者而已故呂望郭子儀俱稱尚父管夷吾稱仲父裴寂稱裴監魏晉以來多有贊拜不名者以人主之待臣子猶爾況常人乎

小人小生

小人二字見於左傳若小生則漢書朱雲傳小生欲相吏耶張禹傳新學小生皆是責人之語若自稱小

生則始於唐韓退之與孟東野寄孟幾道聯句云小  
生何足道又酬司馬盧四兄雲夫院長望秋作云嗟  
我小生值強伴又呂和叔渭海昏集序云不遠數千  
里授簡小生

狀元詞誤

今人唱五百名中第一仙鷓鴣天詞第二句便云花  
如羅綺柳如綿最無意義當是錯誤分曉其詞以第  
二句與第十句對換過義理方通合云五百人中第  
一仙等閑平步上青天綠袍乍着君恩重黃榜初開  
御墨鮮龍作馬玉爲鞭花如羅綺柳如綿時人莫訝  
登科早自是嫦娥愛少年

五  
元  
聖  
書



